

摘藻堂四庫全書薈要

集部



欽定四庫全書薈要

集部

御選宋詩卷四十八

九

詳校官原任主事

臣

李斯咏





欽定四庫全書薈要卷一萬八千三百五十五

集部

御選宋詩卷四十八

七言律詩四

蘇轍

次韻子瞻延生觀後山上小堂

謝公遊意未能厭踏盡登山屐齒尖  
古殿神仙深杳杳香爐煙翠起纖纖  
巖花寂歷飄瓊片庭檜蕭疎漏玉蟾  
帝子暮歸人不見微風細雨自開簾

唐玉真公主  
修道於此山



大人久廢彈琴比借人雷琴以記舊曲十得三  
四率爾拜呈

久厭凡桐不復彈偶然尋繹尚能存  
倉庚鳴樹思前歲  
春水生波滿舊痕  
泉落空巖虛谷應  
珮敲清殿百官喧  
終宵竊聽不能學  
庭樹無風月滿軒

興州新開古東池

山遶興州萬疊青  
池開近郭百泉并  
昔年種柳人安在  
累歲開花藕自生  
波暖跳魚聞樂喜  
人來野鴨望船鳴



西還過此須終日為問使君行未行

送道士楊見素南遊

黃河春漲入隋溝  
任意隨波日夜流  
萬里尋山如野鶴  
一身浮水似輕鷗  
湖風送客那論驛  
嶽寺留人暗度秋  
遲子北歸來見我  
攜琴委曲記深幽

送陳安期都官出城馬上

城中二月不知春  
惟有東風滿面塵  
歸意已隨行客去  
流年驚見柳條新  
簿書填委休何日  
學問榛蕪媿古人



一頃稻田三畝竹故園何負不收身

和柳子玉共城新開御河過所居牆下

卜築共山功欲成新河入縣巧相縈誰將畚鍤千夫力  
添上園林一倍清生長魚蝦供晚饌浮沈鷺鴨放春聲  
為鄰有意非今日丐我餘波伴濯纓

聞王鞏還京會客劇飲戲贈

聞君歸去便招呼笑語不知清夜徂結束佳人試銀甲  
留連狂客惱金吾燭花零落玉山倒詩筆欹斜翠袖扶



暫醉何年依錦瑟東齋還復卧氍毹

除夜會飲南湖懷王輦

歲晚城東故相家夜聽簾外落瓊花醉眠東閣銀缸暗  
起視中庭風竹斜魯酒近來無奈薄秦箏別後苦聞誇  
思君倦對空陂飲歸去紛如日暮鴉

次韻王輦同飲王廷老度支家戲詠

白魚紫螯早霜前有酒何須問聖賢上客遠來工緩頰  
雙鬟為出小垂肩新傳大曲皆精絕忽發狂言亦可憐



莫怪貧家少還往自須先辦買花錢

次韻王廷老寄子瞻

歌吹新成百尺臺青山臨水巧崔巍佳人解作迴文語  
狂客能鳴摻鼓雷擷菊傳杯醒復醉采菱盪漿去仍回  
新年聞欲相從飲春酒還須剩作醅

次韻文務光秀才遊南湖

料峭東風助臘寒汀滢白酒借衰顏滿牀書卷何曾讀  
數步湖光自不閒夢想綠楊垂後浦眼看紅杏照前山



新春漸好君歸速不見遊人暮不還

湖前小山  
曰杏山

遊廬山山陽七詠

錄一首

三峽石橋

三峽波濤飽汴沿過橋雷電記當年江聲彷彿瞿唐口  
石角參差灩澦前應有夜猿啼古木已將秋葉作歸船  
老僧未省遊巴蜀松下相逢問信然

次韻毛國鎮趙景仁倡和三首一贈毛一贈趙

一自詠



治劇從容緩策銜鈴軒無事日清談隼旟畫戟明千里  
紙帳繩牀自一菴金奏屢陳容客和玉山不動看賓酣  
我來邂逅逢寬政忘却漂流身在南

一紙新詩過雁銜醒然何異接君談奉親魚鱉兼臨海  
退食琴書定有菴一別經年真似夢多憂不飲亦如酣  
共君友契非今日蔽芾棠陰自劔南

遠謫江湖舳尾銜到來辛苦向誰談畏人野鶴長依嶺  
厭事山僧祇住菴黃雀頓來成一飽白醪新熟喜初酣



疎頑近日尤堪笑，坐任飄風去自南。

次韻毛君感事書懷

種棠經歲便成科，秋雨調勻氣漸和。  
才力有餘嫌事少，風情無限覺詩多。  
長松更老仍添節，古井雖深自不波。  
宴坐山房人豈識，一尊聊且慰蹉跎。

次韻王適新燕

好雨纖纖潤客衣，新來雙燕力猶微。  
似嫌春早無人見，故待簾開掠地飛。  
南國花期知不遠，中原寒劇未應歸。



養雛不怕巢成早記取朝朝為啓扉

次韻王適東軒即事三首 錄二首

新竹依牆未出尋牆東桃李却成林池塘草長初饒夢  
邨落鶯啼恰稱心江滿船頭朝欲轉泥融屐齒暮尤深  
閉門憐子成書癖試買邨醪相伴斟

眼看東鄰五畝花茅簷竹戶野人家過牆每欲隨飛蝶  
歸舍誰憐已暮鴉幽客偶來成晚飯野僧何日寄新茶  
三年氣味長如此歸計遲遲也自嘉



次韻子瞻初出潁口見淮山

清淮此日見滄浪始覺南來道路長  
窗轉山光時隱見船知水力故軒昂  
白魚受釣收寒玉紅稻堆場列遠岡  
波浪連天東近海乘槎直恐漸茫茫

次韻王鞏上元見寄三首

棄擲良宵君謂何清天流月鑑初磨  
莫辭病眼羞紅燭且試春衫剪薄羅  
蓮艷參差明繡戶舞腰輕瘦颭驚顰  
少年微服天街闊何處相逢解珮珂



繁燈厭倦作閒遊行到僧房院院留月影隨人深有意  
車音爭陌去如流酒消鑿落寧論斗魚照琉璃定幾頭  
過眼繁華真一夢終宵寂寞未應愁

燈火熏天處處同暗遊因避栢臺驄高情自放喧闐外  
勝事偏多淡泊中平日交遊徒夢想留都歌吹憶年豐  
知君未有南來意歸去相從光與鴻

次韻子瞻題泗州監倉東軒二首

錄一首

萬斛塵飛日為霾無心退食自成齋梅生紅粟初迎臘



魚躍銀刀正出淮卧病空看帆度磧誦詩猶記雪填堦  
夾河南北俱形勝且借高城作兩崖

送張恕朝奉南京簽判二首

楚蠓吳柑初著霜梁園官酒試羔羊老如計相非無齒  
清似留侯未却糧杖履稍通賓客過轂蔬要遣子孫嘗  
詔書委曲如公意幕府新除朱紱郎

朱紱還家罷倚門留都無事最宜親下車趨走驚鄰舍  
決獄平反慰老人相見只今多邂逅舊遊他日半埃塵



何年重起扁舟興會作東湖十日賓

次韻曾子開舍人四月十二日扈從二首

錄一首

衣冠雙日款蓬萊簾脫瓊鈎扇不開清曉近驚三殿啓

翠華遙自九天來晨光稍稍侵黃蓋瑞霧霏霏著禁槐

千兩翟車觀禮罷歸時滿載德風迴

是日內外命婦皆會景靈仰瞻三宮

肅然雍穆不言而化諸公之家有能言之者

許將

東山碧巖亭



舊室曾留古岸邊  
新亭同賞碧巖前  
日生獅子峰頭木  
煙伴榴花洞口泉  
黃葉入秋山出地  
白雲臨曉海垂天  
飄然踪跡今何定  
別去江湖又一年

錢總

成都

武侯千載有餘靈  
磐石刀痕尚未平  
巴婦自饒丹穴富  
漢庭還負碧砮征  
雨經蜀市應和酒  
琴到臨邛別寄情  
知有忠臣能叱馭  
不論雲棧更崢嶸



孔文仲

將至南都途中感舊二首寄錢穆父

北風吹雪滿皇州  
攜手同為落魄遊  
霄漢路岐騰萬里  
江湖塵土積千憂  
世情共逐飛蓬轉  
人事都如激浪流  
只待清談慰愁病  
月明幾夜促歸舟

苒苒星霜七換年  
故人已上碧雲天  
書憑去雁雖無便  
路出名都亦有緣  
秋晚樓臺風作雪  
雨餘碕岸柳生煙  
應煩北道開樽俎  
又費公庖幾萬錢



孔武仲

發王務

曉隨燈火背千家落盡疎星見遠霞  
一晌春聲回宿鳥  
半天寒色在啼鴉  
臨陂弱柳猶藏葉  
當路殘梅已盡花  
賴值時光正妍潤  
穩看風物到京華

呈竹元珍

一室蕭然傍禁城  
塵埃不到旅懷清  
水流紅片知花落  
雨浥蒼苔見筍生  
感物已憐春寂寞  
辭家倍覺歲崢嶸



知君亦有淹留歎歸夢西隨杜宇聲

經父云自到京止得一書頗懷憂想因寄

萬事崢嶸不自由年來書信最綢繆雁飛玉塞無多地  
人望神都正倚樓祇恐邊風多浩蕩故令音驛每遲留  
何如款段相隨出鄉曲長為馬少游

羅港

八節灘頭駐馬蹄淙淙流水日沈西歲時久已成陳迹  
風景全然似此溪蘭棹倚洲人競過籃輿索筆我閒題



桃源仙境今何在  
懊惱嬌鶯向暮啼

黃州

客路深秋一轉蓬  
淮天牢落此將窮  
城開雲水蒼茫處  
人在茆簷掩映中  
對岸武昌風月近  
千年赤壁是非空  
愁看陳迹慵開口  
謾把魚竿伴釣翁

晚登庾樓

却從江漢望匡廬  
湓口風波日愈疎  
疎滿甕尚留桑落酒  
登盤今有武昌魚  
斜陽柳色明碕岸  
纖月波光濕太虛



鸚鵡洲前弔豪士重將詞賦為君書

鄂州

綠柳陰陰蔽武昌汀洲如畫引帆檣一江見底自秋色  
千里無風正夕陽暫別勝遊渾老大追思前事只淒涼  
賢豪況有遺蹤在欲買溪山作漫郎

湖山亭

縣山峻絕有新亭公退時來看洞庭天外微茫二湖合  
波心縹緲一峰青非時爽氣生雲雨永夜寒光浸斗星



千古登臨增健筆投文猶可弔湘靈

寄范清老

日挂西南有薄輝稜稜霜氣犯寒衣不愁斗柄隨春轉  
祇怕梅花學雪飛湘浦波光頻送別湓城山色屢思歸  
高人只在南坡住好共留錢買釣磯

湘上

南歸曾泛碧湘船擊汰臨流似浩然平野幾枯殘歲草  
綠波猶浸舊時天簿書倥偬嗟巖邑樽酒歡娛憶少年



尺水片雲今我有亦當風月為留連

次韻和鄧慎思謝劉明復畫道林秋景

鈴齋清話未更端一掃禪林景趣完  
縹緲已裝新殿堦  
縈紆仍引外峰巒冷風有意生空闊  
密雪無聲下廣寒  
平昔所遊今在眼淒涼疑是夢中看

和李時發春日見寄

聞道重湖路未通悠然身在碧湖中  
崎嶇水國猶千里  
牢落春花已半空江浪濺寒侵小睡  
岳雲篩雨響疎蓬



君詩亦說清幽趣便覺年來氣味同

過洞庭

朝來四境宿雲披漸放扁舟入渺瀰  
漠漠衣襟凌水霧悠悠簾幕挂天絲  
波平自喜看書穩風軟翻愁出險遲  
今夜君山興不淺登臨應及月明時

登涵暉亭

常時洲島隔波瀾故覓君山直上看  
罨畫園林春減色水晶宮闕晝添寒  
州城斜引羣峰小湖面平吞數驛寬



坐久西風響喬木扁舟思到武陵灘

送望聖監南嶽廟

還鄉同赴紫宸朝笑語從容慰寂寥  
白髮侵凌今滿鑑青春羈旅舊連鑣  
易江小隱西園在湘浦新除道路遙  
老境不堪論契闊東風官柳亂堤橋

次韻瀛倅鄧慎思見寄

官是麟臺却佐州蓬瀛俱稱列仙遊  
憶分曉色趨天闕想對春風倚郡樓  
書付塞鴻應易到人如隴水正分流



江湖未有歸耕處何日相逢說旅愁

江上

萬里長江一葉舟客心蕭索已驚秋  
亂霞影照山根寺落日光翻水面樓  
淺浦耀金知躍鯉前灘點雪見棲鷗  
少年壯氣悲寥廓未忍滄江下釣鉤

十二月十六日後殿朝謁

晨光先到帝王州別殿珠簾不上鉤  
萬歲聲齊山獻壽九門朝退海分流  
參差雉尾回丹陛杳遠雞聲下禁樓



年少曾來奏詞賦  
釣天却記夢中遊

蘇子瞻雪堂

古縣東邊仄徑開  
先生曾此劬蒿萊  
鸞凰一去應不返  
花柳當年皆自栽  
畫壁蒼茫留水墨  
朱闌剝落長莓苔  
鄰翁笑我來何暮  
檢點風煙興盡回

介之會徐氏家飲薄暮不歸為詩招之

金鞍駿馬照朱門  
樂會高張晉楚軍  
狂客浩歌翻白雪  
艷姬醉舞轉紅裙  
花光灼爍筵前錦  
酒韻氤氳盞上雲



爭似竹窻風月夜青燈殘茗細論文

孔平仲

西軒

新作朱門向水開雖臨行路少塵埃久藏勝境因人發  
盡放青山入座來樹影轉簷碁未散荷香飄枕夢初回  
晚年事事皆踈懶賴得閒官養不才

霽夜

寂歷簾櫳深夜明睡迴清夢戍牆鈴狂風送雨已何處



淡月籠雲猶未醒  
早有秋聲隨墮葉  
獨將涼意伴流螢  
明朝準擬南軒望  
洗出廬山萬丈青

睡起

睡起西風掠鬢輕  
蕭然庭院晚寒生  
浮雲便作飛鴻意  
細雨仍兼落葉聲  
物不求餘隨處足  
事如能省即心清  
山林朝市皆相似  
何必崎嶇隱釣耕

西齋冬夕

平生疎野得江湖  
歲暮西齋擁一爐  
雨滴空階如自語



風吹長木更相呼世間寵辱收碁局樓上光陰入酒壺  
近日睡時全少夢攀緣狂想自知無

和經父登黃鶴樓

複靄重沙望不窮坐收千里一樽中天邊江漢波濤濶  
地下神仙窟宅通窻影偷來湓浦白簷光飛入沔城紅  
豁然已盡登臨興雲閣章亭謾在東

送登州太守出城馬上作

怱怱送客出城闌霜意方高日漸曛青嶂倚空先有雪



黃沙匝地半和雲旌旗明滅隨車遠鼓角悲涼隔水聞  
正是無憀一回首兩行白馬映紅裙

夢錫同遊賀園題詩云誰知清淡者冬月亦登  
臨

寒景崢嶸歲已深誰知清淡亦登臨雨吹廢館苔添暈  
霜落空城樹減陰向曉旋留題葉句隔年先有探花心  
相期紅藥濃開日一醉東風費萬金

寄常父



繚繞龍山半府陰春來漂泊阻登臨蓬萊閣下花多少  
清曠亭前水淺深暮靄漫天迷望目東風絕海送歸心  
新詩亦有思家意應記當年共醉吟

晝眠呈夢錫

百忙之際一間身更有高眠可詫君春入四支濃似酒  
風吹孤夢亂如雲諸生弦誦何妨靜滿座圖書不廢勤  
向晚欠伸徐出戶落花簾外自紛紛

西行



繚繞西行入亂山  
白雲深處據征鞍  
薔花著雨相爭秀  
棗頰迎陽一半丹  
鞅掌未能逃物役  
乾坤何處託身安  
宮臺東向情無限  
那更秋風作暮寒

米芾

望江樓

雲間鐵甕近青天  
縹緲飛樓百尺連  
三峽江聲流筆底  
六朝帆影落尊前  
幾番畫角催紅日  
無事滄洲起白煙  
忽憶賞心何處是  
春風秋月兩茫然



除書學博士初朝謁呈時宰

半生湖海看青山，慣佩苓箬攬轡艱。  
曉起初馳朱雀路，霜華慙綴紫宸班。  
百僚卑處瞻丹陛，五色光中望玉顏。  
浪說書名落人世，非公那解徹天關。

甘露寺晚眺

六代蕭蕭木葉稀，樓高北固落殘暉。  
兩州城郭青煙起，千里江山白鷺飛。  
海近雲濤驚夜夢，天低月露濕秋衣。  
使君肯負平生樂，長倒金鍾盡醉歸。



入境寄集賢林舍人

揚帆載月遠相過佳氣蔥蔥聽誦歌  
路不拾遺知政肅野多滯穗是時和  
天分秋暑資吟興晴獻谿山入醉哦  
須捉蟾蜍共研墨綵箋書盡剪江波

重九會郡樓

山清氣爽九秋天黃葉紅茱滿泛船  
千里結言寧有後羣賢畢至猥居前  
杜郎閒客今焉是謝守風流古所傳  
獨把秋英綠底事老來情味向詩偏



賀鑄

雨晴西郊寓目

城中厭雨過清和偶出西郊野意多  
蠶簇趁晴初摘繭  
麥場經潤欲生蛾  
營巢黃鳥啼深樹  
引犢青牛飲暮河  
老圃念人留竚久  
挽衣沽酒願相過

甲子三月二十五日登快哉亭偶聞舟中吹楊  
葉者有懷京師昔遊因賦

南浦來風拂水紋  
汀洲芳草綠羅裙  
桃花舊雨應相望



楊葉新聲我獨聞  
酸鼻可憐香欲絕  
斷腸不待酒初醺  
斜陽歸去書窻下  
一幅蠻牋賦夢雲

送彭城周主簿建中移黃縣令

客宦逢迎泗上州  
酒籌詩卷慰淹留  
九層燈火偃王塢  
四面青山彭祖樓  
此去君辭棲棘地  
年來吾有負薪憂  
終期一過河陽縣  
相對春風話舊遊

病後登快哉亭

經雨清蟬得意鳴  
征塵斷處見歸程  
病來把酒不知厭



夢後倚樓無限情  
鴉帶斜陽投古剎  
草將野色入荒城  
故園又負黃花約  
但覺秋風髮上生

將發永城留題李氏齋壁

匹馬翩翩寄此身  
可憐投老尚迷津  
黃塵是處隨遊子  
明日相逢即故人  
東道琴樽能惜夜  
西園花絮欲傷春  
分攜後日恩恩去  
燈火虹橋夢更頻

罷大匠屬為淮南行

何處經行特惘然  
津頭曾送木蘭船  
桃花春水生前夜



楊柳秋風憶故年  
驛路尺書疑斷絕  
官倉斗米媿留連  
飄飄復作江湖計  
從此長安是日邊

送畢平仲西上

吟鞭西指鳳皇州  
好趁華年訪昔遊  
新樣春衫裁白苧  
舊題醉墨滿青樓  
鳴鼃雨細生梅潤  
颺燕風高報麥秋  
須念江邊桃葉女  
定從今日望歸舟

廣陵茱萸灣晚泊

冷雲拋雪未成花  
過埭東風凍著沙  
荻浦漁歸初下雁



楓橋市散只啼鴉舊聞南國饒春事行見東風換物華  
老病心情亦何有藥囊詩卷是生涯

宿芥塘佛祠壁間得魏湘畢平仲張士宗昔所  
留字皆吾故人也

青青麴夾欲抽芒浩蕩東風晚更狂微逕斷橋尋古寺  
短籬高樹隔橫塘開門未埽楊花雨待曉先燒柏子香  
底許暫忘行役倦故人題字滿長廊

陳襄



春日賞林亭

把酒春亭覽衆芳，水精簾箔逗山光。  
孤松冷落千年換，野槿紛華一日香。  
綠園煙深迷蛺蝶，曲池波暖睡鴛鴦。  
文園莫惜驕裘費，買取宜城作醉鄉。

夜意

薰爐香燼蕙煙沈，凜冽寒生翡翠衾。  
月國音塵千里信，仙山樓閣五雲深。  
離懷暗耿金壺漏，獨夢多驚玉女砧。  
騎省中郎才調逸，擬將文筆賦秋心。



謁真祠

海宮天路杳無涯  
萬里星津駐客槎  
月下旌旗仙女仗  
雲中樓閣羽人家  
鸞絲緩引霓裳曲  
綺席深傾玉酒霞  
阿母未歸方朔去  
碧桃何日重開花

重陽閣下和同舍

君逢佳節憶還家  
我亦淹留感歲華  
清禁讐書驚白髮  
故園吹帽負黃花  
謝安行有登山屐  
揚子居無載酒車  
何日得歸溪上隱  
大收圖史作生涯



古城

蘆葦蕭疎天氣清水含山色照重城綠蕪何處管絃地  
碧草舊時鐘鼓聲三峽橋邊秋雨過六鰲宮裏夜潮生  
蕭郎秦女無歸約十二瑤臺空月明

和蘇子瞻通判在告中聞余出郊以詩見寄

郊原芳意動遊人湖上晴波見躍鱗閒逐牙旗千騎遠  
暗驚梅萼萬枝新尋僧每拂題詩壁邀客仍將漉酒巾  
寄語文園何所苦且來相伴一行春



和子瞻沿牒京口憶西湖寒食出遊見寄

春陰漠漠燕飛飛可惜春光與子違  
半嶺煙霞紅旆入滿湖風月夜船歸  
維箏一曲人何在遼鶴重來事已非  
猶憶去年題別處烏啼花落客沾衣

喜江南梅度支至二首

錄一首

公望當年最得君畫圖城郭喜同羣  
門前碧浪家家海樓上青山寺寺雲  
松下玉琴邀鶴聽溪邊苔石共僧分  
情多景好知難盡且倒金尊任半醺



郭祥正

阮希聖新軒即席兼呈同會君儀溫老

阮軒要客暮春時  
淡蕩晴絲日正遲  
出屋花光紅碼碯  
隔湖山色碧琉璃  
老榕垂榦侵疎箔  
新鴨呼雛過短籬  
我欲高吟還閣筆  
坐中留蔡總能詩

次韻君儀風物可愛之什

二月風光著意看  
莫思旅食久艱難  
林間鶯喜綿蠻語  
水畔花愁料峭寒  
遊子牽衣攔道飲  
美人攜瑟上樓彈



少陵野老誰能繼君有新詩合築壇

春霽

今朝晴日照柴扉即看輕雲捲翠微燕子有情歸舊棟  
柳條牽恨拂征衣故鄉書信何時到瘴地煙嵐此處稀  
白酒一杯聊強飲物情人事恐相違

小閣夜眺

白日塵寰憂思深夜登危閣解煩襟空江雲盡月涵壁  
絕壑風生松奏琴佳客不來分坐賞濁醪誰為此時斟



疎鐘輒莫催清曉  
吾欲凭欄更一吟

南山晚步簡自宣長老

雨過南山紫翠深  
漣漣仙露灑衣襟  
碧雲影裏寒猿嘯  
玉澗聲中怨鶴吟  
期赴前林同茗酌  
倦投盤石揀松陰  
憑將寄語謝康樂  
安用披荆故遠尋

次韻廣幕黃承事見寄

不記西亭醉別時  
別來佳句愈瑰奇  
心隨雲影沈天角  
夢逐灘聲到海湄  
滿目青山誰共樂  
何年黃卷得同披



遙憐嚴武能為帥幕下爭傳杜老詩

石室後遊

七星山色碧離離山下空巖世所稀  
不獨霧深知豹隱有時水長見龍歸  
方牀瑩潔仙人座文石縱橫織女機  
旋剔蒼苔辨陳迹李邕詞翰亦依稀

九日登北樓示客

九日登高可強歡聽歌莫放玉杯乾  
黃花爛漫宜新酒白髮稀疏落小冠  
桂水波光趨海急峽山嵐翠帶雲寒



故鄉萬里知何處更憑朱欄向北看

姜希哲四照軒送別

幽軒邀客每憑欄景物蕭然世味閒  
翠碧濕煙山匝匝光明隨夜月回環  
一杯濁酒超塵外幾首新詩寄壁間  
不得從容與君語片帆却欲趁風還

次韻行中龍圖遊後浦六首

錄二首

密竹疎松鬪老蒼驚飛白鳥不成雙  
樓船飄忽隨朝電佛炬青瑩徹夜窓  
攜酒且來尋島嶼投竿那用憶湖江



君看雨過鋪晴練得句須令小謝降

細柳高松綠映蒼深沈臺榭晚生涼沙邊宿鷺昏昏白  
草際流螢點點光投網舟移牽碧荇採蓮人去濕紅裳  
欲追逸調嗟何及雨入杯盤歸興狂

寄題玉筍觀蕪簡道正求逐馬草

草名逐馬謂服之久則可

以行逐  
良馬

仙梁飛去有遺壇融結工夫玉未乾一片碧煙鸞舞破  
數枝紅蕊鹿銜殘雨經梅澗芝田熟路入蕭家玉屋寒



晚景自憐行六十欲求逐馬問黃冠

許氏樂隱亭

曲水浮基竹遶簷月華初度晚涼添羽觴灩灩荷敷綠  
象箸森森筍迸尖白眼傲時饒阮籍素琴調曲慕陶潛  
城居樂隱能如此中散風流兄弟兼

楊傑

遊北山

今古忙忙利祿間幾人能此叩松關猿驚鶴怨不知處



虎踞龍蟠空見山芳草路隨流水遠老僧心共白雲閒  
淮南舊隱拋離久一誦移文一媿顏

書寶山寺壁

片帆曾渡謝家洲屈指於今十九秋沙鳥重歸迷戰島  
釣磯空在憶浮丘蒼顏白髮生新感疎竹清風伴雋遊  
借問蓬萊江上月停杯還記故人不

秀溪寒食

十里喧闐錦繡川鞦韆人健趁飛鳶花明柳暗丹青國



日薄雲濃水墨天  
遊女踐成芳草徑  
畫船衝散碧溪煙  
武陵漫說桃源好  
屈指如今幾百年

楊蟠

和東山禪師南澗傍遊戲呈公濟仲晦

澗南一嘯清風發  
林下重來白日長  
雲遠日深連鷺嶺  
水寒沙淺似魚梁  
漫因野老詢前事  
閒伴幽人擷衆芳  
更欲尋源情未已  
知君嗔我索歸忙

陪潤州裴如晦學士遊金山回作



世上蓬萊第幾洲長雲漠漠鳥飛愁海山亂點當軒出  
江水中分遶檻流天遠樓臺橫北固夜深燈火見揚州  
回船却望金陵月獨倚牙旗坐浪頭

酬東山禪師喜公濟仲晦過訪作

數百招提隱亂峰蒼茫那辨講堂鐘春酣賴得黃鸝報  
路轉惟尋白鹿蹤菴在月邊長不鎖興來天外忽相逢  
山人莫笑衣冠客亦有梁鴻待賃春

李公麟



春日出郊

千尋古櫟笑聲中此日春風屬社公  
開眼已憐花壓帽放懷聊喜酒治聾  
操刀割肉餘風在下瓦傳神俚俗同  
聞說已栽桃李徑隔溪遙認淺深紅

曾布

高陽臺衆樂園成被命與金陵易地  
兄弟待罪侍從對更方面實為私門  
之慶走筆寄子開弟樓臺丹碧照天  
涯塞北江南未足誇千里煙波方種  
柳



萬株桃李未開花一麾同下西清路兩鎮高迎上將牙  
回首林塘莫留戀風光還屬阿連家

曾肇

海陵春雨日

公事無多使客稀雨時衙退吏人歸沈煙一炷春陰重  
畫角三聲晚照微柔雉未馴慚報政海鷗相近信忘機  
只將宴坐收心念嬾向人間問是非

葉濤



望舊廬有感

重來舊屋誰為主  
江令蕭條歎獨存  
已媿問人纔識路  
更悲無柳可知門

江令尋宅詩云見桐猶識井看柳尚知門

舟車到處成家

宅歲月惟驚長子孫  
孤客濫巾非得已  
故交零落與誰論

陳洙

遊雲際山

清曉捫蘿踏嶺雲  
寒風飛溜濕衣巾  
上攀霄漢無多地



直視城闌幾點塵古木半陰藏宿霧山禽相語厭遊人  
明年更補閩中吏來看桃花爛漫春

俞紫芝

咏草

滿目芊芊野渡頭不知若箇解忘憂細隨綠水侵離館  
遠帶斜陽過別洲金谷園中荒映月石頭城下碧連秋  
行人悵望王孫去買斷金釵十二樓

旅中諭懷



白浪紅塵二十春就中奔走費光陰有時俗事不稱意  
無限好山都上心一面琴為方外友數篇詩當橐中金  
會須將爾同歸去家在碧溪煙樹深

何耕

浮翠橋

隔溪蒼翠各西東架竹為梁路始通缺月罅林凝淨綠  
斷霞明水抹殘紅芒鞋步步幽深處藜杖聲聲屈曲中  
回首忽驚橋已遠冷然身御圃田風



寒碧亭

憑闌日日俯清湍洗竹年年斬惡竿  
十頃琉璃秋色淨  
一林筴籟曉聲寒涼風有意生天末  
明月無邊照水端  
誰謂過清難久處愚溪元自不相安

遠色閣

小小樓居著散仙淵明真趣本悠然  
招呼雲月闌干曲  
顧揖江山拄杖前獨鳥倦歸翻落日  
誰家晨爨起疎煙  
根塵應接無留礙笑殺西來面壁禪



吳革

登飛泉寺

石磴盤空逼漢槎  
凭闌睇盼渺天涯  
穹窿巧鑿三千界  
瀑瀉狂飛百萬家  
歌鳥當簷喧麗日  
熏風拂座舞巖花  
不須更覓蓬萊勝  
此地登臨亦足誇

張景修

安樂山

映窗猶有雪餘痕  
瓶裏梅花枕上聞  
一椀燈寒聽夜雨



半牀氊煖卧春雲詩成始覺茶消睡昏盡翻然酒帶醺  
我是挂冠林下客山中安樂合平分

孔夷

贈闕子淵

吳越聲飛二十年緇衣空復歎遺編紫芝眉宇風塵外  
太白文章錦繡前可是石渠方載筆未應水國要歸田  
他年雪裏相逢處能記騎驢孟浩然

范周



訪郊子高因登崑山絕頂醉題

萬疊青巒壓巨崑，四垂空闊水天分。  
夜光寒帶三江月，春色陰連百里雲。  
桂子鶴驚空半落，天香僧出定中聞。  
不將此境憑張孟，三百年來屬老文。

郊叟

遣兒僑就學於王介甫，以詩為贄。

十里松陰蔣子山，暮煙收盡梵宮寬。  
夜深更向紫微宿，坐久始知凡骨寒。  
一派石泉流沆瀣，數庭霜竹顫琅玕。



大鵬況有搏風便還許鷦鷯附羽翰

黃庭堅

次韻黃斌老晚遊池亭二首

路入東園無俗駕忽逢佳士喜同遊  
綠荷菡萏稍覺晚黃菊拒霜殊未秋  
客位正須懸榻下主人自愛小塘幽  
老夫多病蠻江上頗憶平生馬少游

岑寂東園可散愁膠膠擾擾夢神遊  
萬竿苦竹旌旗卷一部鳴蛙鼓吹秋  
雨後月前天欲冷身閒心遠地常幽



杜門謝客恐生謗且作人間鵬鷃游

次韻馬荊州

六年絕域夢刀頭判得南還萬事休誰謂石渠劉校尉  
來依絳帳馬荊州霜髭雪鬢共看鏡茱糝菊英同送秋  
他日江梅臘前破還從天際望歸舟

和高仲本喜相見

雨昏南浦曾相對雪滿荊州喜再逢有子才如不羈馬  
知公心是後彫松間尋書冊應多味老傍人門似更慵



何日晴軒親筆硯一尊相屬要從容

次韻蓋郎中率郭郎中休官二首

仕路風波雙白髮閒曹笑傲兩詩流  
故人相見自青眼新貴即今多黑頭  
桃葉柳花明曉市荻芽蒲筍上春洲  
定知聞健休官去酒戶家園得自由

世態已更千變盡心源不受一塵侵  
青春白日無公事紫燕黃鸝俱好音  
付與兒孫知伏臘聽教魚鳥逐飛沈  
黃公壚下曾知味定是逃禪入少林



秦觀

題閻求仁虛樂亭三首

禪房幽構徑彎環  
噪鵲鳴鳩盡日間  
隱几冥濛超物表  
畫圖髣髴見林間  
褰簾雲吐池中月  
岸幘天橫竹外山  
秋興已闌成麗句  
板輿時此慰慈顏

長官平昔嗜林丘  
僧與開亭待勝遊  
脩竹回環扶碧瓦  
小池方折轉清流  
春深鷓鴣催詩句  
夜靜蟾蜍入酒舟  
只恐政成留不得  
縣人空此憶常游



誰構新亭近翠微似教陶令狎天機池光引月來簷廡  
竹影疏風到客衣愛酒有時攜玉笋無絃聊自拂金徽  
人間此樂應無幾肯向良辰與物違

游龍瑞宮次程公韻

靈祠真館閔山隈形勢相高對月臺莓徑翠依屏上轉  
藕花紅繞鑑中開鶴銜寶箭排煙去龍護金書帶雨來  
夾道萬星攢騎火滿城爭看使君回

次韻子由題平山堂



棟宇高開古寺間，盡收佳處入雕欄。  
山浮海上青螺遠，天轉江南碧玉寬。  
雨檻幽花滋淺淚，風巵清酒漲微瀾。  
游人若論登臨美，須作淮東第一觀。

次韻子由題摘星亭

崑崙左右兩招提，中起孤高雉堞西。  
不見燒香成宿霧，虛傳栽錦作障泥。  
螢流花苑飛星亂，蕪滿春城綠髮齊。  
長憶凭欄風雨後，斷虹明處海天低。

遊鑑湖



畫舫珠簾出繚牆  
天風吹到芰荷鄉  
水光入座杯盤瑩  
花氣侵人笑語香  
翡翠側身窺綠酒  
蜻蜓偷眼避紅粧  
蒲萄力緩單衣怯  
始信湖中五月涼

謁禹廟

陰陰古殿注修廊  
海伯靈川儼在旁  
一代衣冠埋石窆  
千年風雨鎖梅梁  
碧雲暮合稽山暗  
紅芰秋開鑑水香  
令我免魚絲帝力恨  
無歌舞奠椒漿

蓬萊閣



雄簷傑檻跨崢嶸席上風雲指顧生千里勝形歸俎豆  
七州和氣入簫笙人遊晚岸朱樓遠鳥度晴空碧障橫  
今夜請看東越分藩星應帶少微明

中秋口號

雲山簷楯接低空公宴初開氣鬱蔥照海旌幢秋色裏  
激天鼓吹月明中香槽旋滴珠千顆歌扇驚圍玉一叢  
二十四橋人望處台星正在廣寒宮

和孫莘老遊龍洞



葦蕭傳火度冥冥乍入清都醉魄醒草隱月崖垂鳳尾  
風生陰穴帶龍腥壁間泉貯千鍾碧門外天橫數尺青  
更欲仗筇留頃刻却疑朝市已千齡

次韻羅正之惠綿扇

吳扇新翻製素綿名郎持贈意俱圓有人充戶修明月  
無女乘鸞向紫煙供奉宜升清暑殿動搖合作御風仙  
誰知揮却青蠅輩功在春蠶一覺眠

燕觴亭



碧流如鏡羽觴飛夏木陰陰五月時清渭日長遊女困  
武陵春去落花遲玉笙吹罷觥籌錯密炬燒殘簪珥遺  
吳越風流公第一未輸山簡習家池

御選宋詩卷四十八



欽定四庫全書薈要卷一萬八千三百五十六

集部

御選宋詩卷四十九

七言律詩五

晁補之

魚溝懷家

生涯身事任東西  
藥笥書囊偶自齋  
柳嫩桑柔鴉欲乳  
雪消冰動麥初齊  
沙頭晚日檣竿直  
淮上春風雁鶩低  
歸去未應芳物老  
桃花如錦遍松溪



鎖試呈同舍

官局悠悠共此行來時庭菊未含英  
五更脫葉驚書几  
一夜寒砧滿禁城  
詩似涼風來有思  
酒如清露浥無聲  
何時驄馬催歸去  
更有林端魄一生

澠池道中寄福昌令張景良通直

十年一夢間湖湘  
欲往從之道阻長  
可但知君愛彭澤  
不應言我薄淮陽  
馬穿峻底流泉白  
鳥下關頭落照黃  
愁作驛亭寒不寐  
懷人思古九迴腸



次韻李拒靈山亭宴集寵戲之句

勝遊誰繼竹林賢  
峴首高情自邈然  
寶刹千尋出天半  
靈山三面落樽前  
梅花摘得寧煩驛  
桃葉呼來不用船  
南楚何須說窮巷  
且陪鈴閣聽鷗絃

晁說之

送湯子才

江湖此去水連空  
萬賈連樯浩渺中  
帆影浸斜青草月  
笛聲吹盡碧蘆風  
未論魏闕功名近  
不與巴山氣象同



更到臨平看輦路沙堤十里軟塵紅

溪上

野老門前雲覆溪雨晴雲氣亦霏微水生蘆筍纖纖長  
日暖楊花細細飛得食慈烏皆反哺卷簾乳燕自知歸  
天涯物色堪行樂況復淮西近解圍

潯陽

渺渺蒼江遶郭流菰蒲杜若滿汀洲山雲不動飛黃鶴  
春水無邊沒白鷗日落荒城聞戍鼓天晴絕浦見行舟



老夫舊有湘湖興聊復今年作遠遊

予己未十月二十有二日去涪上越明年八月  
二十有八日以事再來觀山川之勝無異於昔  
而予之幽憂抑鬱亦自若也

重來間曳杖藜行阜帽依前似管寧風雨只如當日恨  
江山不改故時青天寒未夕窗先暝霜晚無聲葉自零  
詩罷時為洛生詠醉吟聊使故人聽

晁冲之



送惠純上人游閩

蚤聽閩人說土風此身嘗欲到閩中  
春溝水動茶花白夏谷雲生荔子紅  
襟帶九江山不斷梯航百粵海相通  
北窗夜展圖經看手自題書寄遠公

次二十一兄韻

憶在長安最少年酒酣到處一欣然  
獵回漢苑秋高夜飲罷秦臺雪作天  
不擬伊優陪殿下相隨于蒨過樓前  
如今白髮山城裏宴坐觀空習斷緣



次韻集津兄懷嵩少示王立之

早聞三十六峰前願寄茅茨一澗邊  
谷轉馬蹄山繚繞巖開虎口樹嬋娟  
陽坡日暖宜瓜地陰嶺天寒熟芋田  
便好與公相隱去不宜相對尚茫然

送僧歸建州

清秋潁汝歸時晚不及羣公送惠休  
曲几數行題字別扁舟幾日為詩留  
東吳楊柳雲中渚南越梅花雪外洲  
萬里故鄉聊一到江山風物往來游



張耒

探春有感

柳萼蒙茸待放綿櫻桃新葉大如錢  
深春冷落花殘後寒食朦朧月淡天  
獨坐每將詩作伴遣愁安得酒如泉  
傷心千里休凝望城外東風草滿川

暮春

夜雨輕寒拂曉晴牡丹開盡過清明  
庭前落絮誰家柳葉裏新聲是處鶯  
白髮生來如有信青春歸去更無情



便當種秫長成酒遠學陶潛過此生

秋興

薄雲蔽日曉悠悠  
簷雨蕭蕭急未收  
佳樹已彫今歲葉  
西風還是去年秋  
蹉跎不奈時驚客  
牢落惟憑酒散愁  
多病支離欣得睡  
晚來涼氣滿衾裯

秋雨不止

陋巷柴門掩寂寥  
一窗風雨晚蕭蕭  
清秋漸冷尤宜嬾  
閒日苦長無處消  
烏几青筇扶病弱  
素琴黃卷任逍遙



交朋南北音書隔雖有芳尊誰可招

夏日雜興二首

牆下溪流清且長夾溪喬木雨蒼蒼  
裊風翠果擎枝重照水圓荷舞葉涼  
蝸殼已枯黏粉壁燕泥時落污書床  
南山野客間相過贈我能携藥滿筐

蔬圃茅齋三畝餘溪光山影動浮虛  
病妻老去惟尋藥稚子年來解愛書  
中散無堪心放蕩馮唐已老興蕭疎  
全真養素安吾分敢謂軒裳不我如



水南春望

洛岸東風送馬行  
橋橫落日半川明  
天連觀閣雲垂地  
春入山河秀滿城  
老去飄萍甘屏跡  
興來懷古未忘情  
短歌一曲聊回首  
不待悲秋白髮生

泊舟候水

一水悠悠斷復連  
卸帆終日小灘前  
青旗招飲篙工醉  
五兩歌風賈客眠  
樹色遠分芳草路  
鳥行斜斷夕陽天  
漁舟慣伴危檣宿  
饋我霜鱗不用錢



秋日登海州乘槎亭

海上西風八月涼，乘槎亭外水茫茫。  
人家日暖漁樵樂，山路秋晴松栢香。  
隔水飛來鴻陣闊，趁潮歸去櫓聲忙。  
蓬萊方丈知何處，煙浪參差在夕陽。

屋東

蒼鳩呼雨屋東啼，麥穗初長燕子飛。  
竹裏人家雞犬靜，水邊官舍吏民稀。  
溪聲夜漲寒通枕，山色朝晴翠染衣。  
賴有西鄰好詩句，賡酬終日自忘機。



和即事

溪如圓塹木如城魚鳥從遊信此情  
啁雀踏枝飛尚裊  
仰荷承雨側還傾彈琴久廢重尋譜  
種藥求多旋記名  
於世久判無妙策直應歸學老農耕

春日遣興二首

流光向老惜芳菲搔首悲歌心事違  
野綠染成延晝永  
亂紅吹盡放春歸  
荆榛廢苑人間牧風雨空城鳥夜飛  
斷送一番桃李盡可憐桑柘有光輝



日烘煙柳軟於絲桃李成塵綠滿枝芳草有情隨處好  
落花無賴信風吹關心傷感知何處過眼芳菲能幾時  
一病春來妨痛飲遣愁惟有強裁詩

夏日三首

錄二首

長夏邨墟風日清簷牙燕雀已生成蝶衣曬粉花枝午  
蛛網添絲屋角晴落落踈簾邀月影嘈嘈虛枕納溪聲  
久拚兩鬢如霜雪直欲樵漁過此生

棗徑瓜畦經雨長白衫烏帽野人裝幽花避日房房斂



翠樹含風葉葉涼  
養拙久拚藏姓字  
致身安用巧文章  
漢廷卿相皆豪傑  
不遇何妨白髮郎

離富池望廬岳是日入夾口直達潯陽遂舍大  
江之險示同行

山秀江清三百里  
與君三宿一扁舟  
飲殘桑落溪雲暮  
卧冷桃笙楚雨秋  
舟隱長江逢夾口  
眼明五老立峰頭  
幾年澤國行將遍  
歸與親朋說舊遊

縣齋



只合門如野叟家市朝聲利苦喧譁但知得醉頻酤酒  
何處逢春不見花暗樹五更雞報曉晚庭三疊鼓催衙  
知君宰邑端無事吟笑何妨到暮鴉

泊舟都梁亭二首

錄一首

旅枕無眠客夢勞五更傍舍一雞號淮天水濶浮梁小  
城郭霜清寶堦高梅鎖冷香通雀啄水翻新綠出漁篙  
君恩許作還鄉客肯向江離賦廣騷

登楚望北樓



裊裊危樓百尺梯，秋風有客獨攀躋。  
路窮流水遠更遠，目斷夕陽西復西。  
簾卷似迎輕燕入，柳深時有暗蟬嘶。  
洞庭落葉悲騷客，鴨鵝何勞著意啼。

赴官壽安泛汴

西來秋興日蕭條，昨夜新霜緝緼袍。  
開遍菊花殘蕊盡，落餘寒水舊痕高。  
蕭蕭官樹皆黃葉，處處邨旗有濁醪。  
老補一官西入洛，幸聞山水頗風騷。

三鄉懷古



清洛東流去不還漢唐遺事有無間廟荒古木連空谷

宮廢春蕪入亂山

地有光武祠連昌宮

南陌絮飛人寂寂空城花

落鳥闌闌登臨幾度遊人老又對東風髻欲斑

### 歸馬

歸馬駸駸不受鞭晚霞如畫照晴川  
蕭疎黃葉孤舟岸零落秋雲斷雁天  
臨水登山悲楚客烹雞酌酒愛詩仙  
任從老逐霜毛至莫遣愁來玉盞邊

### 官舍歲暮感懷書事



衙鼓鼕鼕送夕陽經時無客上高堂  
淵明柳老秋多雨  
子敬鑊寒夜有霜  
山樹葉稀晴摘果  
齋爐灰煖晚焚香  
經綸自有英雄在  
閒散須教屬漫郎

北風吹雁去翩翩  
留滯周南又一年  
田為歲荒陶令秫  
酒無人乞廣文  
錢香籠鉢水清晨咒  
坐煖蒲團後夜禪  
更謝晴明好山色  
數峰殘雪在簷前

雪晴野望

蕭蕭空谷隱山雲  
渡水人歸何處邨  
樵徑雪迷唐苑路



鳥聲寒集漢祠門  
公堂吏散惟修竹  
近嶺林疎見飲猿  
客坐無羶君莫笑  
陶潛亦有酒盈樽

寒食贈遊客

陰陰畫幕映雕欄  
一縷微香寶篆殘  
寒食園林三月近  
落花風雨五更寒  
箏調寶柱絃初穩  
酒滿金壺飲未乾  
明日踏青郊外去  
綠楊門巷繫雕鞍

次韻秦七寄道潛

衰疲久厭五更朝  
每媿冥鴻在泮寥  
顧我塵冠彫舊鬢



愛君山桂長新條  
文詞畫虎工逾拙  
世味春冰老益消  
只欲歸依香火社  
高堂時聽法音潮

陳師道

次韻李節推九日登南山

平林廣野騎臺荒  
山寺鳴鐘報夕陽  
人事自生今日意  
寒花只作去年香  
巾歆更覺霜侵髻  
語妙何妨石作腸  
落木無邊江不盡  
此身此日更須忙

寄亳州林待制



湖海相望闕寄聲  
雲林過雨未全晴  
青衫作吏非前日  
白首論文笑後生  
似聽兒童迎五馬  
稍修書札問專城  
一聞苦李蒙莊句  
不復人間後世名

春懷示鄰里

斷牆著雨蝸成字  
老屋無僧燕作家  
剩欲出門追笑語  
却嫌歸鬢著塵沙  
風翻蛛網開三面  
雷動蜂窠趁兩衙  
屢失南鄰春事約  
只今容有未開花

和冠十一晚登白門



重門傑觀屹相望表裏山河自一方  
小市張燈歸意動輕衫當戶晚風長  
孤臣白首逢新政遊子青春見故鄉  
富貴本非吾輩事江湖安得更相忘

和李使君九日登戲馬臺

登高能賦屬吾儕不用傳杯擊鉢催  
九日風光堪落帽中年懷抱更登臺  
江山信美因人勝萸菊逢辰滿意開  
二謝風流今復見千年留句待君來

和休文至自新安



無成底事到天涯重見春工換柳枝歷盡江山苦行役  
歸來風雨過花時馳驅共厭人間世險阻時聞別後詩  
獨有窮愁消未盡一番相見一伸眉

登彭祖樓

城上危樓江上城風流千載擅佳名水兼汴泗浮天闊  
山入青齊煥眼明喬木下泉餘故國黃鸝白鳥解人情  
須知壯士多秋思不露文章世已驚

和富中容朝散值雨感懷



節物驚心嬾復嗟樽中酒盡復誰賒風撩雨脚俄成陣  
雪閣雲頭欲結花萬里可堪長作客一年將盡未還家  
自憐落落終難合白首詩書謾五車

送澤之過維揚

夢裏揚州十載間青樓陳迹故依然袍爭爛錦催詩筆  
雨濺明珠落酒船顧我老無騎鶴興羨君行及看花天  
囊中繡句歸應滿不負韋郎五色箋

九日寄秦少游



疾風迴雨水明霞沙步叢祠欲暮鴉九日青樽欺白髮  
十年為客負黃花登高懷遠心如在向老逢辰意有加  
淮海少年天下士可能無地落烏紗

和劉元樂月夜寄賈耘老

胡牀欲上庾公樓那復周南歎滯留皓魄光連鮫室午  
疎星冷浸洞庭秋錦袍有興思姑熟桃楫無心問莫愁  
喚取長江來入社不勞牛渚問行舟

蘇頌



又和次中答莘老見招

近甸無辭暫駐車  
吳門雖好隔重湖  
且嘗竹苑迎霜兔  
休憶松江上釣鱸  
老見交朋尤眷戀  
醉吟風月好躊躇  
廣陵喜得賢賓客  
簪履光華勝毒珠

彭汝礪

和瑛師

江湖日夜著東流水  
上乾坤一點浮  
隔浦雲山隨客步  
近邨花竹慰人愁  
同舟自有林宗在  
結社還須惠遠游



酒興正酣歸更嬾坐看涼月上滄洲

萬安道中

上下雞籠牛口灘灘頭濯濯雨聲寒氣蒸曉日雲無際  
波漾春風雪未乾落絮並花浮遠水飛鷗隨鷺落驚湍  
扁舟穩泛滄浪遠珍重嚴陵一釣竿

澄心亭

逸老初開池上亭使君鐘鼓樂新成寶林自有湖山助  
定水何從風浪生雨過淡雲迷島嶼日長幽鳥下簷楹



扁舟遠汎滄浪碧可避時人笑獨清

濟叔潤之兄弟見送出小渡

欲置窮通逐水漚共君歌舞醉新秋  
詩詞可愛題黃葉別意難忘寄綠洲  
雨過微風催去棹夜涼明月滿歸舟  
又隨天外一飛鵲可羨波前雙白鷗

晚晴

萬里無雲雨意醒江湖滿載夕陽明  
老翁暮釣扁舟去稚子歸樵一笛橫  
溪月悠悠含夜意林風細細作秋聲



詩魂散落無羈束試效樊川賦晚晴

李昭玘

南遊道中

玉鱸金虀昔未嘗幾回飛夢到滄浪鄉關望處歸期晚  
風水聲中去路長梅使南來問行驛雁聲北度下斜陽  
囊錢未盡江湖近擬買漁舟學漫郎

登平山堂

斷檻歌簷風雨頻不逢心賞為重新依稀疊嶂宛如畫



憔悴垂楊今復春一闌高歌長在耳後來佳客復何人  
悠然未盡雲煙思不見揚州十里塵

迎駕

端門萬騎錦衣紅迤邐鳴梢下半空天極奧居黃道北  
瑤池歸仗五雲中金輿影度長廊日法曲聲回廣殿風  
泗水昔年曾夢到拜恩何幸接鵷鴻

李之儀

春日



卷四十九  
芊芊芳草望中迷，傳火樓臺麗日西。  
飛絮輕翻遮柳陌，落花亂點暗桃蹊。  
琉璃波淨沈魚素，玳瑁簾疎阻燕泥。  
百五良辰最蔥蒨，綠陰行馬過鶯啼。

薄雲

薄雲疎雨灑雕籠，槎拂銀潢月上弓。  
紅淚半殘歌後燭，翠濤低湧夢回風。  
淬餘劒鏑難為利，解盡犀株未見通。  
杳杳芝田定何許，斷魂無計脫驚鴻。

劉季孫



寄蘇內翰

倦壓鰲頭請左符  
笑尋潁尾為西湖  
二三賢守去非遠  
六一清風今不孤  
四海共知霜鬢滿  
重陽曾插菊花無  
聚星堂上誰先到  
欲傍金尊倒玉壺

廖正一

和補之梅花

蕙蘭芳草久睽離  
偶洩春光此一枝  
自許輕盈羞粉白  
何人閑麗得鄰窺  
寒欺薄酒魂消夜  
月入重簾夢破時



幸有暗香襟袖煖江南歸信不應遲

賈收

題有美堂

自刊宸畫入雲端神物應須護翠巖吳越不藏千里色  
斗牛常占一天寒四簷望盡回頭嬾萬象搜來下筆難  
誰信靜中疎拙意畧無蹤跡到波瀾

沈偕

遺賈耘老蟬



黃杭稻熟墜西風肥入江南十月雄橫踈蹢跚鉗齒白  
圓臍吸脇斗膏紅螯須園老香研柚羹藉庖丁細擘蔥  
分寄橫塘溪上客持螯莫放酒杯空

謝逸

寄隱士

先生骨相不封侯卜居但得林塘幽家藏玉唾幾千卷  
手校韋編三十秋相知四海孰青眼高卧一菴今白頭  
襄陽耆舊詢名德祇有龐公不入州



謝邁

喜董彥逸自仙巖歸

鉢囊高挂同僧夏  
遠寄巖間一把茅  
地僻狙猴常作伴  
食貧蕨荀不充庖  
瘦藤任拄萬峰頂  
野鶴來歸千歲巢  
檢點篋中詩幾首  
蒼頭特遣為君抄

送王坦夫由淮南入京

王郎乘興上扁舟  
數遣書來寫我憂  
奏牘三千待金馬  
卷簾十里夢揚州  
桃花水漲理歸楫  
蓮葉杯香消客愁



白髮倚門長望子細君應賦大刀頭

玉茗花

佳園昨夜變春容清曉驚開玉一叢  
素質定欺雲液白淺粧羞退鶴翎紅  
似聞金谷初無種欲畫驚溪恐未工  
底事餘花避三舍孤高原有使君風

謂魯公也

洪炎

石湖院

古木參天水一溝潮來曲折可藏舟  
招提密映晴嵐起



滄海潛通夜氣浮  
丹荔薦盤驚北客  
赤蟬供饌識炎洲  
却疑江左知名士  
不作乘桴浩蕩遊

汪革

寄謝無逸

問訊江南謝康樂  
溪堂春木想扶疎  
高談何日看揮麈  
安步從來未當車  
但得丹霞訪龐老  
何須狗監薦相如  
新年更勵於陵節  
妻子同鋤五畝蔬

胡致隆



落星樓卽事

葛巾藤杖竹籐陰夜靜江樓縱目初  
海獸擎山出彭蠡  
玉龍銜水下匡廬三更雲淨猿啼露十里月寒人捕魚  
已問湖山借主角他年來此老樵漁

仰山寺

山下清泉迸石流山前松竹自春秋  
猿吟古寺偏深處  
雲集羣峰最上頭一老有靈飛窅堵二神無語鎖寒湫  
諸天更在藤蘿外欲踏層巔悵未由



朱長文

次韻子文抱病幽居之作

幾年彩筆擅詞場  
髣髴相饒色更蒼  
千里舊聞稱驥駟  
九霄安得接鸞凰  
醉凭淨几拋烏帽  
閒捲新詩置錦囊  
治世莫將公幹比  
松陵風物勝清漳

次韻公權子通唱酬春晚遣懷

春華急似曉天星  
誰得年年髣髴青  
露濯淺深枝上錦  
風吹離合水中萍  
吟餘金谷香隨步  
書罷蘭亭酒欲醒



擬把冽泉同一酌為君林下洗寒瓶

次韻俞子文南軒雨後

農疇已種圃畦青  
高卧丘園自放情  
客少不嫌三徑濕  
年豐休歎一瓢清  
殘鶯喜向風前囀  
病鶴猶能月下鳴  
十載令名如有得  
莫愁軒冕老無成

東隱者

不愛紛華愛寂寥  
松風竹月共蕭蕭  
因隨野鶴過三徑  
每對江鷗洗一瓢  
無復塵埃沾短褐  
尚思煙水泛歸橈



道人肯與義之友飛錫重來莫待招

劉弇

春日送簽判陽承議

春山野思萬千重那更江頭來送公別淚滴流紅杏雨  
離情搖曳綠楊風一枝易繞南飛鵲隻字難憑北塞鴻  
惟有感恩情不斷夜深長在夢魂中

寄兜率悅禪師

篋輿曾約下山顏白足塵緣等是慳貪為水雲留物外



劣容紙墨到人間銀潢一掬愁枯肺金鑰千重想上闕  
病客此身似籠鳥何時毳衲對爛斑

蔡京

恭和御製南郊祭天齋宮即事

袞龍朱履午堦南大輦鸞鳴羽衛嚴玉軫乍回黃道穩  
金烏初上白雲遲五門曉氣開旗尾萬騎花光入帽簷  
已見神光昭感格鶴書恩下萬邦霑

任伯雨



元日

憶昔東班賀紫宸和風佳氣淨無塵  
龍墀初下觚稜日雉扇齊開玉座春  
接武九霄曾近侍投荒三載作流人  
窮通忤合雖天理俯仰尋思不為身

鄒浩

濟明不與虎丘之遊作詩寄之

虎據千年一故丘邇來形勝絕南州  
池清不礙龍收影臺迴猶疑石點頭  
白日青天秋更好幅巾藜杖曉同遊



遙知正擁雙旌坐直上雲峰一凭樓

枯荷

萬頃菱荷一一荒駢頭相倚卧池塘追惟弄日搖深綠  
不謂凌風折敗黃飢雁飛銜投遠渚寒魚浮觸動斜陽  
那知凜凜梢雲者自有松筠傲雪霜

劉安上

和左經臣見過

為愛端居上邵章里閭何幸得徜徉買田郭外春耕早



築室湖濱野趣長且把舊書遮病眼了無塵事擾中腸  
故人訪我留佳句應笑年來兩鬢蒼

和馮中丞中秋夜月

捲盡浮雲見碧虛初傳更漏滴銅壺入秋爽氣迴然別  
此夜冰輪何處無共想姮娥依桂魄獨憐飛鵲繞庭梧  
西園散飲歸來早不用紅紗照路隅

蘇過

送曇秀



三年避地少經過十日論詩喜琢磨自欲灰心老南嶽  
猶能蠶足慰東坡來時野寺無魚鼓去後閒門有雀羅  
從此期師真似月斷雲時復挂星河

吳則禮

簡田升之時升之赴金陵

建業風流端可憐石城江色曉新鮮鳥窺漢節梅花底  
雨濕施樓春水邊霜髮讐書有東觀錦囊覓句屬南天  
枯腸不飽大官肉我種芋魁今十年



唐庚

和程大夫荔枝

家在岷峨飽荔枝十年遊宦但神馳側生流落今千載  
入貢稱珍彼一時定自不將凡果比如何偏與瘴煙宜  
白頭莫作江南客辜負山中故友期

晚春寄友人

眼底春愁惱殺儂揚州往事旋成空風流只合稱狂客  
衰颯何堪作病翁水國春深梅子雨江天日暮鯉魚風



何時執手同尊酒收拾清歡笑語中

灌息軒

仙家林館碧雲圍埽却浮塵晝掩扉萬事年來俱是幻  
一瓶朝汲已忘機花深曲徑春無盡人在閒庭鳥不飛  
見說漢陰今復有欲凌霄漢挹清輝

收家書

西州消息到南州骨肉無他歲有秋驥子解吟青玉案  
木蘭堪戰黑山頭即時旅思春冰坼昨夜燈花黍穗抽



從此歸田應坐享故山已為理菟裘

壬辰九月不雨至己年三月穡事去矣今夕輒  
復沛然喜甚卧作

老去生涯白木鐙脫逢艱食更何堪春深野色憂年惡  
夜半簷聲覺雨甘睡外莫聽泥活活想中已覩麥含含  
明朝竹徑添幽事玉版堂頭作小參

故游茂先大夫元祐初為唐安守豪逸喜賓客  
能劇飲談笑蓋陳孟公之流今唐安絃索之盛



甲於兩蜀自游使君始後累遷至秦鳳憲以卒  
既二十餘年而其子振旅遊嶠南相遇於惠州  
作此詩贈之

唐安千指錄琵琶故事猶聞蜀叟誇尊酒何人陪北海  
練裙今日見西華子歸未得頻芳草我老無成學種瓜  
萬里相逢俱白首班荆長語夕陽斜

黃裳

聞雁



露下多時雁未鳴  
數聲雲外此宵征  
北人書到三秋盡  
南國弓開一字橫  
孤館有誰驚好夢  
平蘆何處起寒更  
相應俎上終須免  
宜向方塘寄此生

初秋偶作

火行金候雨猶爭  
擾擾蚊蠅自未平  
雲漏雨聲蒸地爽  
日含山氣暮天明  
直須紈扇恩情斷  
始向籬花意態生  
萬里壁寒無一點  
月明中看雁初橫

社日遊雲門山



不須扶我自登山脚力能勝十八盤一字雁低頭上過  
兩城人細掌中看雖知北戶緣猶在却笑南柯夢未闌  
忽見歸雲應是信滿襟先得洞天寒

桐廬會景亭

物華才思兩無窮來倚闌千萬累空今古坐間山遠近  
悲歡潮後客西東譙樓上下夕陽外漁網高低煙雨中  
想見飛昇人只在留題當識紫元翁

昔有桐君戴  
顥得仙於此

田亘



江梅

千林含凍鬱蒼蒼只有江梅獨自芳  
暗吐幽香穿別院半欹斜影入寒塘  
冰膚宛是姑仙女粉面端疑騎省郎  
若是蜜奴曾拂掠肯收紅豔貯蜂房

楊時

潁昌西湖泛舟

扁舟乘興漫追尋路轉河迴入柳陰  
拂面落花春意盡避人幽鳥野情深  
慙無健思供吟筆賴有寒花映客心



日暮倚風歸棹急一鉤新月挂瑤岑

合江亭晚眺

倚杖鉤簾兩水間晴光飛影上雕闌帆催畫鷁搏風去  
雪吐銛鋒作劒攢平野煙浮迷遠目晚溪潮漲失前灘  
騎鯨一往扶桑近休問人間行路難

遊玉峰閣

蒼藤秀木遶空庭疊石層巒擁畫屏混沌鑿開幽竅遠  
巨靈分破兩峰青雲藏野色春常在風入衣襟酒易醒



採玉遺蹤無處問擬投簪紱學仙經

王簿清輝亭

黛染煙蘿拂檻低抱城流水綠逶迤澄瀾碎影搖青鏡  
斜日流峰隱半規坐上盈樽無俗客壁間照夜有新詩  
登臨已動忘歸興況復清談足解頤

汴上

天上行雲曳白衣半銜晴日在林扉盤花落雁驚還起  
啄食飢鳥起不飛榆莢青錢飄已盡月堤流水澣相圍



征途處處塵隨眼多病長年與世違

荊州書事

江湖泛泛一虛舟去作人間浪漫遊  
歲晚光陰雲冉冉畏途風雨日浮浮  
萬鍾信是樊中雉一櫂聊同水上鷗  
投老蘼鹽成底事憑誰為種橘千頭

千里瀕江地可毛結廬何必故山椒  
載醪不過斜川路飲水誰同陋  
蒼瓢勿問雞蟲間得失但知鵬鷁各逍遙  
黃塵滿眼僧窗靜坐對風花意自消



直舍大風書事寄循道

枕書無寐首空搔，萬竅噓風正怒號。  
雪意浮空迷遠目，月林梳影見秋毫。  
幽亭所藉惟荒草，妙理應須付濁醪。  
誰念維舟江上客，落帆千里壓雲濤。

望湖樓晚眺

斜日侵簾上玉鉤，簷花飛動錦文浮。  
湖光寫出千峰秀，天影融成十里秋。  
翠鷗翻風窺淺水，片雲隨意入滄洲。  
流連更待東窗月，注目晴空獨倚樓。



游酢

遊寶應寺

峯嶺三峰帶白灣誰開蘭若翠微間  
竹牀雲嬾禪心定  
草徑苔荒屐齒斑  
天入碧嵐成玉宇  
鳥飛青嶂出塵寰  
此中即是蕊珠境  
遮莫閒吟一解顏

游九言

金陵野外廢寺

寒花窈窕蔓頽牆  
古寺蒼苔晝掩房  
犬吠屋頭山杳杳



蟲鳴階隙草荒荒  
池塘淡月蒹葭冷  
籬竹西風橘柚香  
六代江山金碧地  
斷碑留得管興亡

題古田寺西堂壁

傾巖終日倦躋攀  
暫借僧廬半日間  
砌下微流走清泚  
窗前含籜墮爛斑  
風來有徑侵危坐  
雲出無心度遠山  
勸取高人長寄翫  
相隨猿鶴傲林間

王安中

觀僧舍山茶



山僧手種兩山茶看到婆娑鬢已華應為客懷驚歲杪  
先將春色照天涯綠裁犀甲層層葉紅染猩脣豔豔花  
凍頰如丹相映渥不辭衝雨踏泥沙

韓駒

聞富鄭公少時隨侍至此讀書景德寺後人為  
作祠堂因跋予舊詩後以自嘲

藤牀瓦枕快清風破悶文書亦漫供鄉信未傳霜後雁  
羈懷生怯晚來鐘淹留已辨三年計流落應無萬戶封



猶有壁間詩句在他時誰肯寫塵容

次韻王給事觀殿試唱名

集英春殿唱諸生日轉觚稜晚色清近侍皆分金帶赤

內人爭看雪衣明

內人多自昇平樓上下觀

罷朝詔賜羣公坐合殿

歡傳萬歲聲我老倦隨宮漏永江南江北聽鼉更

次韻侯思孺將至黃州見簡

未用船頭報水程為君持酒打愁城青山久負當年約  
白髮多從客路生點檢轉工新句法揩磨難減舊風情



小留莫道無供給一味東籬有落英

次韻南溪觀魚

城西鼓楫又城東不待溪分上下風  
碧樹垂楊間黃綠  
冰盤行鱸簇青紅  
橫塘日暮林巒合  
斷岸秋來浦溆通  
安得此身無世累  
便隨漁艇入空濛

次韻徐翰林

遠聞仙伯上神山  
始覺昇平氣象還  
一夢休論玉堂事  
兩行曾綴紫宸班  
想燒傳燭書天詔  
看剪花驄出帝關



尚憶平生故人否夜驅黃犢在田間

何大圭

偶然作

茆屋松窗小隱家茶煙漠漠水斜斜  
簷間乳燕未成語庭下石榴爭放花  
賴有詩書消白日倦隨車馬走黃沙  
林泉舊約好徑去風雨滿江垂釣車

盧襄

窗外梅花



已消殘雪豆稽灰斜壓疎籬一半開雖我故園無分看  
問渠春色幾時來冷香漸欲薰詩夢落蕊猶能韻砌臺  
定復水邊多屐齒試令長鬣視蒼苔

喻汝礪

草堂詩

遠與曲洲縱復橫沙邊繁鳥弄簫笙一軒簷冷松陰合  
十里林香藥草生路轉斷楂逢石坐風移深竹見僧行  
晚來懷抱尤清曠時有幽人帶月耕



傅察

尉治吏隱亭

公餘吏隱創新亭野闊雲低疊素屏風動荷香翻偃蓋  
日搖波影散疎星望窮南畝千重綠坐久西山數點青  
更待晚涼蟬亂噪與君散策試同聽

野宿

沂水秋風揚短棹穿林落日繫孤舟心清乍喜離囂俗  
野曠翻疑動旅愁歸雁高飛雲杳杳幽蟲夜語草悠悠



此間景物君知否即是瀟湘一片秋

滕茂實

五日

節物驚心動遠思薰風又見浴蘭時  
空尋好句書紈扇  
無復佳人繫綵絲  
酒注菖蒲唯欲醉  
筒包菰黍不勝悲  
明年此日當何處  
風裏孤蓬自不知

立春

東皇布政物皆春  
山色禽聲便可人  
滿谷和風消積雪



半窗晴日動游塵  
宮花插帽枝枝秀  
菜甲堆盤種種新  
拘窘經時成土俗  
聊從一醉適天真

御選宋詩卷四十九



謹案卷四十八第十九頁前二行故園又負黃花  
約刊本花訛昏據慶湖遺老集改







欽定四庫全書

總校官庶吉士臣侍朝  
校對官檢討臣蕭九成  
騰錄舉人臣李駟



欽定四庫全書薈要

集部

御選宋詩卷五十

詳校官原任主事<sup>臣</sup>李斯咏





欽定四庫全書薈要卷一萬八千三百五十七

集部

御選宋詩卷五十

七言律詩六

李綱

詠草

夢覺池塘碧草萋  
風搖煙濕已菲菲  
繚連山色不知遠  
惆悵王孫何日歸  
微質已知煩雨露  
寸心終欲報春暉  
芳根縱腐猶能化  
舞蝶流螢到處飛





遊麻姑山

魯公詞翰勒山巔，鯁峭風姿亦喜仙。  
假道來遊非偶爾，追尋遺跡更茫然。  
野花幽草堪成夢，老鶴喬松不記年。  
誰謂瑤臺無路到，月明風露正娟娟。

吳江

重過松江憶舊遊，依然風景照行舟。  
危橋跨水虹垂影，高閣憑虛蜃吐樓。  
渺渺衝煙歸釣艇，輕輕點浪舞沙鷗。  
暮天橫笛江邛起，激烈能令逐客愁。



雜興

日出霜晴鳥雀呼東裝還復戒征途黃牛傍岸將孤犢  
花鴨浮溪引衆雛橋斷水寒尋野艇路迷山曲問田夫  
遠遊看盡川原景待向龍津畫作圖

慢亭峰

燕罷虹橋絕世氛曾孫誰見武夷君更無裊幕空中舉  
時有笙竽靜處聞猿鳥夜啼千嶂月松篁寒鎖一溪雲  
洞天杳杳知何處翠石蒼崖日欲曛



清明日

憶昔叨塵寓帝京春光澹蕩值清明  
賜來新火傳紅蠟煮就香糜和白餠  
遊女踏青尋苑草街童引線起風箏  
沙陽寂寞都無此卧看山雲聽水聲

泛碧齋

舟名

畫齋初泛碧溪潯十里津平疊翠岑  
拍岸煙波梅雨細連天芳草嶺雲深  
媿煩斷取西湖景暫慰傾思北闕心  
好是清宵山吐月水光天影共沈沈



自西津乘泛碧齋歸邑小雨

亂山深處翠光浮  
山寺歸來泛彩舟  
十里峰巒凝暮靄  
一溪煙雨灑清秋  
漁燈照水明還暗  
野桂飄香散不收  
只向畫中求好景  
不知身在畫中遊

呂頤浩

次韻張全真參政退老堂

東郊卜築傍溪流  
菡萏香中寄小舟  
脫去簪紳歸畎畝  
悟來漁釣勝公侯  
青雲舊好何妨厚  
白雪新詩為寵留



又指湘潭問行路一堂風月阻同遊

陳東

次韻同舍李冲壽夜坐

時引金杯拔劍看光鋐高徹斗牛寒要令世事從心淡  
可謂人情徹鼻酸經術豈應窮皓首文章何用苦雕肝  
吾徒行與功名會莫作羈人日夜歎

歐陽澈

寄周居安



周郎辭氣帶煙霞凜凜秋霜嚼齒牙塵尾動思談吐屑  
筆頭遙想夢生花三年幸獲從遊款一別那知歲月賒  
遠辱飛奴傳翰墨顏筋柳骨最秋蛇

秋試下第卽事有感寄國鎮

籬角金英噴異香杜門岑寂獨持觴風掀脫葉橫斜舞  
雲襯平林淺淡黃空管有情增哽噎野花無緒伴淒涼  
不禁景物撩秋眼剩與新篇付錦囊

戲促朝宗酒約



雨收雲海湧金盆簾捲香絲破篆紋雙陸無心酬白壁  
十千有約醉紅裙哦詩誤許聯師服載酒真當過子雲  
待遣秋娘呈妙舞春衫已把水沉薰

春霽

繡出園林霽色新長郊芳草綠無垠日籠瑞氣輕浮幌  
風掠花芬暗襲人蝶慕竊香爭趁暖鶯思求友競啼春  
試將何物澆詩胆活火調湯濺玉塵

臨溪弱柳



柳弄嬌黃暖律催臨溪約畧笑殘梅鴨頭春水可環綠  
龜甲屏山掩映開媚日依依籠霧閣搖風裊裊拂煙梳  
柔絲恨不同攀折獨立江皋首重迴

原上晚步聞笛有感

一笛誰橫透晚空傷懷真作鳥窺籠解龜換酒無知己  
拾穗行歌喜屢豐沐雨秋山遮眼碧舞風霜葉點溪紅  
老農植杖來相問藉草高談夕照中

遊盤龍涉傳巖有感簡朝宗



招提清曠竭來遊潑墨嵐光眼界幽黃絹碑亡思子禮  
碧雲詩好憶湯休風簷目送書空雁煙塢愁聞喚雨鳩  
銷鑠睡魔澆茗盃桐窓拾得一枝秋

陳欽若時寓盤龍作詩寄之因紀吟詠之美

凜凜冰霜嚼齒牙沈沈清夜詠簷花摩雲氣逸干星斗  
落紙詞妍帶綺霞醉埽麝煤奔渴驥困紆象管引秋蛇  
擬尋紅樹賡詩社却日揮戈不許斜

州學貴中亭上作



漠漠陰凝水墨天  
雨絲成陣拂窗前  
千層疊嶽籠輕靄  
一帶澄江鎖淡煙  
歸思似雲空散亂  
客蹤如葉尚流連  
當時錯笑悲風賦  
今日閒愁頓黯然

和希哲軒上韻與友游華嚴五雲峰

劒戟峰攢迴絕塵  
捫蘿宜謁社中人  
雖無樽酒邀元亮  
恰有清談敵季真  
漱玉泉聲清洗耳  
靄雲香縷靜怡神  
支公況是忘形侶  
不訝林宗折角巾

歸途遣興借朝宗韻簡敦仁



緩著歸鞭水石鄉  
息鞍箕踞小橋傍  
煙滋竹葉雙叢玉  
秋著蘆花一岸霜  
潑眼溪山增爽氣  
襲人蘭蕙破幽香  
擬提吟筆扛洪鼎  
反笑虬蟬不自量

自鷺橋復用前韻

旗亭解轡詠江鄉  
屬玉雙飛綠澗傍  
水墨園林初過雨  
青黃橙橘未經霜  
鼎烹雲液澆腸爽  
甕撥春醅破鼻香  
回首漫驚煙水遠  
向來清味怯思量

和世弼蓼花



粧點千叢蘸碧流寧甘淡竚對清秋白蘋許共搖風細  
黃菊欣同占景幽羞泄異香招舞蝶獨施繁豔伴漁舟  
懽騰醉眼牽情處贏得淒涼一段愁

謝人惠紫竹杖

王猷珍重惠龍孫策險扶危價莫論爛醉懸錢過酒肆  
狂吟步月打僧門虛心尚有凌雲操勁節元無染淚痕  
寄語香山居士道朱藤雖好未為尊

和子賢夏日晚望



溪山潑墨水雲秋似綺餘霞次第收  
燦燦拒霜鋪蓼岸雙雙屬玉舞蘋州  
杳無錦字來憑雁擬滅機心試狎鷗  
望裏碧雲還又合數峰江上忍凝眸

鄧肅

子安提舉次韻二首

錄一首

怪底祥光夜滿門朝來入社得詩人  
空疎嗟我句無眼俊逸知君筆有神  
共隱兵戈不到處相攜雲水自由身  
便當痛飲追河朔紅雪繽紛膾錦鱗



成彥女奴琵琶

婷婷裊裊出紗窗坐使紅粧萬目降  
翠袖薄籠春筍十玉釵初合綠雲雙  
四絃對客追三疊萬喚令人憶九江  
曼倩酒狂本無量為渠激灩倒銀缸

次韻鄭成彥

搶榆不羨貼天飛冷落柴門半掩扉  
花榭水軒催客老飯囊酒甕與心違  
風流沈約自應瘦美好陳平今已非  
誰似宗盟重山嶽九環金帶稱腰圍



葉夢得

西齋初成解中舊有太湖石數十株因植之庭  
下

萬壑千巖不易求壺中聊寄小瀛洲  
稍看碑兀雲峰出便有檀欒桂樹幽  
絕境自知難遽忘竒蹤爭怪莫能留  
山翁已老猶兒戲漫擬伸眉一散愁

蔡子因相過留踰月

解作江山一月留仲文儒雅更風流  
欲知雀躍心能喜



正愛蟬連語不休築室君方論並舍

子因約同居雪上

歸山我

已辦扁舟交親四海今餘幾萬事傷心付白頭

徐敦濟書報嘗過余石林

繞澗新添數百竿故人書為報平安似聞謾謾山風響  
正想陰陰夏簟寒老去不能窮蠹簡歸來便擬挂塵冠  
一杯且覓林間約莫枉山王廢舊歡

送嚴壻侍郎北使

朔風吹雪暗龍荒荷橐驚看玉節郎  
枯矢石砮傳地產



醫閭析木照天光傳車玉帛風塵息盟府山河歲月長  
寄語遺民知帝力勉拋鋒鏑事耕桑

徐敷立相過

茅齋一曲傍寒灣邂逅終年伴我閒契濶易驚成歲月  
追尋空復對江山暫留客枕聽疎雨遙想吾廬掩舊關  
落莫歸心誰與話坐談聊為起衰顏

汪藻

書寧川驛壁



過眼空花一餉休坐狂猶得佐名州雖遭龍吏嗤韓子  
却喜溪神識柳侯盡日野田行穰稌有時雲嶠聽鉤輅  
會將新濯滄浪足踏遍千巖萬壑秋

次韻向君受感秋

且欲相隨苜蓿盤不須多問沐猴冠菊花有意浮杯酒  
桐葉無聲下井闌千里江山漁笛晚十年燈火客羶寒  
男兒幾許功名事華髮催人不少寬

晚發吳城山



風埽陽侯雪陣平  
雨催摩詰畫圖成  
氣吞浦溆重林盡  
秋著江湖去鳥明  
厚祿故人無一字  
長年三老伴餘生  
會須滿意開懷抱  
到眼廬山不世情

醉別寄高侍郎

疇昔追隨翰墨場  
功名今日媿劉郎  
英姿合上凌煙閣  
巧譖曾遭偃月堂  
雙槳又乘清夜去  
一樽聊發少年狂  
歸來却共燈花語  
騎省看成滿鏡霜

廖剛



代祖父次韻酬羅君寶見贈

蕭條門巷陋於顏老去青春僅得閒  
心畫傳家無計策手談留客漫機關  
靜思往事千年上俯歎勞生一夢間  
多謝光臨無別意為聞流水與高山

題楊子光雙谿閣

倚天華棟俯長洲渺渺雙谿一鑑秋  
匹馬問津迷去客亂帆分港競歸舟  
花飄雨洞紅交浪影落三山翠合流  
清夜鳴榔何處曲冷光平泛玉簾鉤



和逸道春雪

春雷未發春工淺  
春雪濛濛日華曉  
戶玉樓迷舊燕  
晚村瓊樹照寒鴉  
籠金不礙鶯穿柳  
覆錦猶妨蝶戀花  
憑仗東風吹更暖  
桃源端欲訪仙家

李彌遜

出汗過淮有作

十年猶媿飽侏儒  
却到淮山識舊途  
一櫂輕於堂上芥  
此身閒似水中鳧  
受風帆影隨南北  
弄日雲容自有無



不用浮槎泛滄海半生全欲老江湖

雲門道中晚步

層林疊巘暗東西山轉岡迴路更迷望與浮雲奔落日  
步隨流水赴前溪樵歸野燒孤煙盡牛卧春犁小麥低  
獨繞輞川圖畫裏醉扶白叟杖青藜

渡橫溪

百尺滄浪兩岸沙肩輿徒涉步歌斜溪聲猶帶夜來雨  
山色漸分雲外霞岸半斷林開鳥道水邊疎竹近人家



塵埃何處尋真境試逐寒流認落花

和錢申伯遊東山聖泉

偶脫塵中一夢闌欲窮幽事遍尋山靜憐人境雞蟲擾  
老愜僧窓枕簟閒十里秋香隨屐齒四更山月上簾顏  
登臨物色催詩興未信天於我輩慳

上巳日陪徽守遊白水寺繼登西山繼白堂晚  
飲

曉衢初日動遊人疊嶂回溪綠黛新自偃松篁如喚客



後開桃李尚留春  
笑談懷遠西山上  
觴詠追時白水濱  
五馬行春從此始  
更驅風伯淨車塵

初到連江和林公晫先輩

投老身名信陸沈  
欲將白髮寄遙岑  
賦詩未敢師彭澤  
抱甕真堪友漢陰  
江面飛橋誇壯麗  
山腰卧石閔幽深  
公才清絕參奇觀  
慰我長年去國心

和穎仲山行即事

平蕪新綠占封圻  
橫路遊絲網落暉  
山徑人稀藏窈窕



禪扉春盡老芳菲  
緩行照水知魚樂  
隨意穿花見蝶飛  
二子昇簾今夜月  
龍鍾猶勝杖藜歸

筠莊李花正開雨不得往似表弟有詩次韻

經旬長雨暗春山  
小白枝頭正可攀  
賸欲叩舷浮綠淨  
未容著屐上蒼頑  
題詩過我工排悶  
載酒留人肯破慳  
要及花時酬老大  
筍輿從此不須閒

凝碧晚望

秋來何必送將歸  
落日高臺意自悲  
一壑未容追汗漫



三鍾猶得飽支離  
黃花對客如相笑  
白髮尋人似有期  
時序不堪翻覆手  
每逢佳處亦開眉

秋日同劉方明遊石師巖

翠合峰巒萬葉稠  
雲擎佛屋出巖幽  
秋光不到庭陰樹  
曉日先明竹外樓  
戶牖高低分世界  
川原遠近失汀洲  
湯休示我真消息  
更在靈山最上頭

南樓晚望

用葉碩夫韻

海角長安望爾賒  
日邊雲影更橫斜  
身閒夢覺俱成蝶



眼病朝昏只見花，可但陶潛能避俗。  
不應范蠡便浮家。  
君恩未報驚華髮，目斷飛鴻水四涯。

初歸筠莊蘇粹之以詩見貽次韻答之二首

八尺茅茨老竹林，細償南北故園心。  
一溪止水清涵月，三日行雲薄釀霖。  
歸計欲成猶恨晚，醉愁無賴正傷今。  
喚回柏子香中夢，屋角秋聲亂翠陰。

他年同上楚江樓，花遶春城小謝州。  
翻手雨雲人事改，跳丸日月歲光流。  
霜空暮落能鳴雁，秋水風移不繫舟。



偶築一丘鄰勝隱杖筇衝雨亦來遊

筠溪待月

偶坐松根送落暉竹風零露濕人衣  
亂螢點水只自照宿鳥赴林猶並飛  
玉塔微瀾秋月吐澄江淨練夜潮歸  
好山不負平生約故傍吾廬翠作圍

題福唐郡園清閼亭

公餘自種南堦竹好事風流今未聞  
但得七人來結友何須千畝比封君  
風梢不定惟藏日雨葉初乾薄帶雲



自是甘棠人愛惜不憂寒谷遇樵斤

次韻季申樞密萬象亭

丈人手筆與仙通點化虛無若轉蓬妙寄七言千嶂外  
全收萬象一簷中深堂細篆觀澄水落日危欄數去鴻  
更壓小槽囊古錦共臨高處待春風

孫覲

山行憩田舍老父出迎以黃柑白酒為餉

藜杖扶來雪滿簪諄諄語好意彌深酒傾白墮杯行玉



橘破黃包坐，飮金醉起。莫辭田父肘，甘餘須識野人心。  
怱怱不盡遮，留意挽袖丁寧更一臨。

次韻王子欽春望

萬木陰中鎖，沈寥晨門秣。馬聽蕭蕭故人自欲分，茵去  
逐客何勞折。簡招共對春風班，露草却隨明月下浮橋。  
擊鮮故有諸郎在三尺，銀刀貫柳條。

建昌守朱宜伯寄酒小詩為謝

愛酒淵明望，白衣傳聞騎吏款。柴扉為憐漁父鳴鞭送，



欲使山翁倒載歸  
淚向琵琶絃上落  
心隨蝴蝶夢中飛  
一杯屬我寬愁病  
免使黎侯詠式微

和何襲明詩六首

錄二首

沙平雪漫水涵空  
路入千巖紫翠中  
邨遠微明漁舍火  
樓空斜矗酒旗風  
可憐方外狂司馬  
未伴車中一秃翁  
南北相望三十載  
心期不改斷金同

瘴雨蠻煙埽地空  
衆星環列拱天中  
豹章尚隱南山霧  
鵬背終搏北海風  
麟閣似聞登漢將  
鹿門猶自卧龐翁



低回莫負平生志冠蓋風雲萬里同

南山寺

千丈雲根蔭此邦沈沈寒影卧秋江潭空映日蒼虬動  
煙暖翹沙白鷺雙夢覺灘聲喧客枕吟餘竹色滿僧窓  
詩成絕叫層樓上聽我洪鐘萬石撞

王左司致政還鄉

水滿滄浪舊釣磯春風江上片帆歸繁紅不見桃千樹  
老榦空驚柳十圍萬壑煙雲供坐嘯一龕香火結真依



落花細草應堪藉  
醉撼長條雪滿衣

題惠聲伯溪亭

小檻天紅直欲然  
喬林老翠自生煙  
雲蘿屬地青霞帔  
雨英填溝赤仄錢  
折柳貫魚初受釣  
解龜換酒看垂蓮  
便須秉燭追長夜  
花減春歸又一年

周紫芝

宿隱靜作

短策羸驂山路長  
松陰十里午風涼  
飛來一水自碧落



屹立五峰聚寶坊青鳥也隨人聽法老禪聊為客燒香  
泉聲繞枕渾如雨月色滿巖疑是霜

次韻姑谿興國寺晚眺

禪房花木有殘紅此地還因曲徑通竹影看搖金瑣碎  
風鈴解語玉丁東人來白鳥橫空處山在先生倚杖中  
絕唱未酬才已盡夜燈搔首髻如蓬

東牆橘將熟催以長句

木奴嫋嫋半垂牆故惱幽人苦未忙雨細不妨無賴綠



簾疎時與可憐香誰將磊落黃金顆為付甘酸白雪囊  
只有天公真解事便須先借滿林霜

環翠亭

客裏常隨倦鳥還翠屏空夢小屏顏更將臨老雙愁眼  
來看平生未見山西子為誰顰遠黛湘娥何事結煙鬟  
千巖萬壑無人處便是輞川圖畫間

雨作留水西溪漲不可復歸

東溪打槳過西溪南嶺雲飛北嶺時鳥語屢呼人載酒



山行不厭雨催詩靜中秋色人間少客裏泉聲夜半知  
老去隨緣皆可耳愁霖未用苦相欺

次韻何君與晚晴

花深雨過一鳩鳴喚起何郎對晚晴暮靄連山明白鷺  
夕陽回處帶啼鶯浮生可笑能幾履萬事更須論一枰  
想起追隨共飛蓋玉觴零亂酒催行

訪張元明山齋

張侯詩似嶺雲閒飛鳥何心只念還醉裏有官如物外



眼前無客似山間來聽春枕連宵雨看盡秋屏着色山  
老去此身無處用固應容我作躋攀

須江暮春二首

三月陰晴江上天江花落盡水平川紅蠶老去桑垂椹  
黃鳥飛來柳撲綿千里心常懸夢裏十分春總在愁邊  
時時更謝蘇司業乞與杖頭沽酒錢

淮上風埃滿客衣二年樓閣送斜暉心如落絮隨風去  
春與殘花作伴歸塞外夕烽悲鼓角江邊飛雨濕旌旂



只今便覓東臯路已悵南山種豆非

次韻遠猷旅夕二首

西風滿眼莫登樓回望鄉關去末由晚色不催金絡馬  
夜燈空夢玉搔頭梁王行識相如賦楚國方悲宋玉秋  
萬里長途知不晚一杯聊為老人留

久占無何作醉鄉人間萬事只逢場潘郎已老漫華髮  
夢得多情還斷腸政恐新愁無處着不知清夜為誰長  
煩君試草思歸曲付與蛾眉小抑揚



次韻王彥猷參謀山中寄茶字韻詩卷二首

詩如摩詰自名家未數劉顛賦雪車問字誰攜子雲酒  
敲門擬送玉川茶回頭拾得風前句埽地先除眼界花  
老去無緣渾似夢相隨真欲問毗邪

扁舟流浪作浮家病齒彫零脫左車千里歸心秋後燕  
一年春事雨前茶他時我自開三徑此去君當判六花  
相見已還平日願豚蹄何用祝汙邪

次韻明叔九日見懷



準擬重陽共一杯幅巾臨水復登臺  
落花撲面君相送落葉滿山人未回  
故國只憑幽夢到斷腸頻寄尺書來  
此生終向江湖老黃菊紅萸笑漫催

僕將南歸笑庵以詩見留次韻

思家一日似三秋病眼淒然怯上樓  
十幅風蒲催我去數枝煙竹為君留  
還將曉枕燈前白分作孤蓬雨後愁  
便合北來尋老伴人間何處有湯休

張元明羅仲共賦郡池白蓮花僕時在淮西十



二月中休方德修始出巨軸追和

花似當時傅粉郎不須湯餅試新粧固知桃李無國色  
猶恐蘭蓀是俗香人在匡廬新結社詩傳淮楚夢還鄉  
波沈不見香羅襪空向牛腰得夜光

陪徐使君登秋浦樓

白髮衰顏已倦遊倚樓端為使君留天連遠嶠雲埋寺  
波撼孤城水遶樓有客自舒愁外眼何人解寫雨中秋  
世間無此登臨勝休把城南說閬州



二十三日雨霽再陪徐使君登秋浦樓

細雨愁雲特地晴  
重來水秀復山明  
江風吹面滄波動  
嵐氣侵衣翠潤生  
南浦落帆催畫角  
麗譙殘照滿雙旌  
未知九日齊山會  
樽酒何人與共傾

二月二十八日靜寄軒作

看得階前碧草濃  
小桃猶作亞枝紅  
五更夢斷雞鳴雨  
二月寒生燕子風  
歸意擬尋黃蔑舫  
春愁最惱白頭翁  
鶴長鳬短知多少  
盡付軒渠一笑中



張元明為道卿畫竹間梅

我作東窓竹外開，斷魂香自雪邊來。  
細尋水墨圖中意，似對檀欒塢裏梅。  
筆下懸知有冰玉，胷中元自少風埃。  
可憐能事王摩詰，解遣春從一笑回。

題周掾西山亭

江靜雲恬眼界空，危亭高枕麗譙東。  
風來雨後憑欄處，山在人間拄笏中。  
春去平蕪隨處有，鳥啼斜日滿林紅。  
伯仁空洞渾無物，容我清樽一笑同。



次韻道卿聞新鶯

草長江南春欲闌  
曉鶯聲在綠陰間  
定應春恨知公子  
故作清歌學小蠻  
催盡落花風自煖  
喚醒愁眼日長閒  
隔枝時見黃金羽  
始信庭柯會解顏

三月二十二日春雨終日

此情誰與問天公  
幽事全歸白髮翁  
袖手尋詩紅燭裏  
卷簾聽雨綠陰中  
杯盤眼見櫻桃熟  
時節新驚柳絮空  
誰為羈棲到三月  
還家猶及舞雩風



次韻德莊送別

千里辭家復卧疴，賴君一笑肯相過。  
夢看赤鯉春騰浪，歸見牽牛秋渡河。  
空裏嬾能書怪事，酒中自可作無何。  
一竿忍負平生意，重釣花姑溪上波。

晚雨薄寒枕上作

睡過花時常掩關，老人歡意自應闌。  
愁邊可奈雨如許，客裏不禁天尚寒。  
數月鄉音無雁到，一年春事已梅酸。  
夢餘猶憶江頭路，擬喚歸舟下急湍。



二月二十三日薄雪

湖上春風結暮陰  
亂雲堆雪晚來深  
便隨柳絮飛將去  
誰管桃花冷不禁  
自苦多愁成客恨  
不關難測是天心  
乘除妙理誰能會  
明日朝暾忽滿林

旅夜

棲棲羈客眼常開  
簌簌清燈落曉灰  
北雁有情書未到  
寒衾無夢雨頻來  
今年白髮看仍少  
去日青春挽不回  
別後故山應好在  
小窓辜負翠雲堆



次韻蘇元藻對雪長句

晚來風定雪初平到手杯行不暫停  
夜色遠欺江月白  
天花寧羨野梅馨  
遙瞻玉闕心先喜  
一見瑤林眼自青  
回首西湖在何處  
借君詩作遠山屏

趙觀察作齋名煙艇  
孫耘老作唐律相邀同賦  
乃次其韻

知君心本在滄洲  
故揭寒齋作釣舟  
已遣江湖頻入夢  
便呼鷗鳥與同遊  
浮驂未可追前事  
畫舫猶堪擬勝流



笠澤有家歸未得斷腸蘆葉荻花秋

次韻方元相見寄

一椽元著亂山叢強入天街踏軟紅老去只思青眼舊  
詩來猶數白頭翁身遊吳越千山外春落邯鄲曉枕中  
賴有可人俱在眼舉杯惟欠與君同

次韻徐伯遠題錢少愚畫孤山月梅圖

錢郎名與大年齊貌得孤山一段奇月色昏昏人寂寂  
梅花淡淡水漪漪戲將三昧傳神手

東坡有趙昌花傳神之語催動



千林破臘枝不用摩挲窺妙墨暗香疎影在新詩

九月望日月色如晝

靜夜無人鵲轉柯冷蟾分影照金波月如白玉盤初挂  
天似青銅鏡始磨正好中秋無此色不知今夕定如何  
錦袍太白憑誰問應趁春風上大羅

再用筒字韻呈相之季共

柳邊輕絮不禁風春事如梭過眼空已有繁枝催暗綠  
忍看疎雨打殘紅強隨瘦馬歌烏帽已合秋江把釣筒



賴此同遊兩陶謝詩成渾在笑談中

春晚偶題

春與桃花作伴歸不須更著雨頻催  
簾垂盡日無人處  
柳送晴天落絮來  
愁裏酒杯誰共把  
眼前書葉嬾重開  
那知造物憐幽獨  
忍遣啼鶯喚夢回

次韻相之見過口占雪中  
新句且許約季共攜  
山谷書伯時畫過敝廬

寒欺玉樹雪橫斜  
遙想諸郎擬玉華

玉華鹽名  
出金樓子

更借蟾



蜍千里月細看簷蔔一林花公名已在曹劉上我輩才堪屈宋衙聞道高軒同二妙竹坡猶有雪煎茶

次韻季共和相之作二首

誰從玉闕蓬萊殿吹下仙人萼綠華風急有時翻柳絮月寒無數著梅花時聞病眼看三白勝著青衫趁兩衙欲煮南屏山下雪問誰能點老謙茶

雪意鬢鬢整復斜似人雙鬢不勝華只今瘦馬歌風帽空憶寒江釣浪花妙舞正看回激楚兩鋒旋欲戰彭衙



不將鹽絮輕相比似我南窓玉色茶

次韻林察院賀章正言得子

海中仙果著新枝可是香山得子遲

劉夢得和樂天詩有海中仙果子生

遲之

雛鳳遠從丹穴至神駒初出渥洼時平生種德無

遺恨他日傳家有是兒聞道長庚曾入夢已應能作上

樓詩

唐人載李白襁褓中其家攜之上樓問頗能作詩否即應聲作絕句一首所謂不敢高聲語恐驚天

上人者是也

登垂虹亭



雲水蒼茫共渺然  
眼看飛鳥沒蒼煙  
山圍百雉吳王國  
風急千帆震澤船  
白髮飄流身已老  
斷編零落事空傳  
誰將無色胸中畫  
貌取吳中萬頃天

僕歸自武林蒙舒元相徐美祖諸君皆惠詩乍  
歸老倦未蘇始以一詩為報聊以塞後時之責

函

紅塵染盡去時衣  
愁入雙蓬鬢髮稀  
故國幾番隨夢到  
長安十度送春歸  
嬾看烏帽朝騎馬  
却憶黃紬晝掩扉



鳥倦知還吾已老會令雙鵠貼雲飛

相國風流原有種徐卿苗裔固應稀青衫好著君猶未  
黃髮無多我合歸清夢曉聽湖上雨暮年猶借水邊扉  
南來未是安巢鳥擬趁西風著處飛

九江趙倅新作環秀亭

小攜尊酒作清遊尋得方壺最上頭山在斷霞明處碧  
江從白鳥去邊流苦無健句爭天巧賴有新亭慰客愁  
他日東南論勝地未應只數庾公樓



題向司戶鄉林圖

宸奎猶作麝煙浮，便艤歸航結小樓。  
何處訪求三島路，徑須圖畫百花洲。  
黃金殿裏鵷鸞夢，白鷺江頭草樹秋。  
天上歸來輞川住，世間那有此風流。

傷春二首擬近體

錄一首

越羅初欲替茸裘，二月輕寒比麥秋。  
潘老彫疎空惜髻，庾郎憔悴不禁愁。  
催歸燕子春何限，打盡桃花雨未休。  
誰遣少年隨夢去，不教人似柳風流。



曉雨用都倅韻

亂敲簷瓦曉初零  
聲入孤燈影半青  
枕上有詩因雨得  
窓間無客對牀聽  
翠光洗出山千疊  
金色添成菊萬鈴  
收取新涼歸酒盞  
莫將雙眼為愁醒

金鈴菊又名萬鈴又

次韻元壽見贈

畫簷橫著小闌干  
看盡西來最好山  
帶雨楚江依約處  
隔煙淮樹有無間  
已煩造物分幽趣  
合就餘年了燕閒  
借使眼前無此妙  
可能不似鳥知還



朱翌

示同會

無奈春寒老不禁  
喜看晴日上窓櫺  
羣花半露乾坤巧  
百刻平分晝夜停  
拄杖有時挑菜甲  
桔槔無復問畦丁  
逢春不出何為者  
衆醉誰知可獨醒

王庭珪

過劉美中新居

亂碧峰頭水拍堤  
白沙寒竹淨柴扉  
晨光破霧千山出



絕壁盤雲一雁飛  
窓外煙霞舒錦綺  
坐中談笑落珠璣  
江邊野老逢人說  
待看追鋒入翠微

登滕王閣二首

錄一首

滕王歌舞今千載  
髣髴鳴鑾度綺窓  
尚有殘霞伴孤鷺  
時聞晚唱下長瀧  
危闌傑棟臨無地  
翠嶺層陰落半江  
欲詠珠簾捲山雨  
含毫自覺寸心降

寄賀劉美中舍人直學士院

明光清曉玉開闕  
脚踏金鑾近侍班  
行盡九重天上路



正臨方丈海中山紫微閣對青霄近紅藥花翻白日閒  
待看飛龍催賜馬錦袍蓮燭夜深還

出城北由山徑入徹源忽逢荷花彌望不知為  
何處詢其地名曰長塘又行數里行大路出連  
嶺作詩紀之

山根細路遶長塘忽有荷花照水光欲入孤邨看青壁  
却逢千蓋擁紅妝採蓮不見溪中女緩轡徒牽馬上郎  
行傍綠堤將過盡回鞭小住惜餘香



長沙試院聞傳彥濟永州考試還先寄此詩

永叔

出試院詩有云入  
簾蝴蝶報人家

歸馬鏘然响轡環  
道傍春色正爛斑  
吟登回雁峰頭月  
覽遍清湘雨後山  
剩有虹霓蟠筆下  
喜聞蝴蝶入簾間  
花時獨鎖深深院  
卧聽笙簫夢裏還

### 春日山行

緩轡青絲馬不嘶  
春山草長靜柴扉  
迸林新筍斑斑出  
隔水幽禽款款飛  
雨過泉聲鳴嶺背  
日長花氣撲人衣



雲藏遠岫茶煙起知有僧居在翠微

再過東岡

物色江寒楓葉彫江邊微雨暮蕭蕭  
白沙翠竹舊行路  
碧水朱闌新渡橋  
盡室當時避征戰  
十年間事付漁樵  
如今傑屋明人眼  
一笑端能覆酒瓢

別葛德裕主簿

官冷身閒簿領稀  
時從物外赴襟期  
憑君少緩青絲鞵  
為我聊傾碧玉卮  
野寺石泉秋煮茗  
松窓雪屋夜論詩



懸知別後東風近先寄寒梅第一枝

題郭秀才釣亭

野閣江寒一雁飛  
碧蘆花老鱖魚肥  
遶闌綠水秋初淨  
滿棹白蘋人未歸  
醉任狂風揭茅屋  
卧聽殘雪打蓑衣  
他年欲訪沙頭路  
會自攜竿扣竹扉

次韻江正邦

盧溪春水欲平堤  
滿徑蓬蒿竹掩扉  
齋館靜無塵土雜  
盤餐喜有藥苗肥  
君尋甘露峰前住  
人似山陰雪後歸



江海未應終寂寞鶴書將下釣璜磯

春曉招友人

庭前好樹宿煙浮上有珍禽啼不休  
花發亂紅稠屋角柳翻新綠出牆頭  
起看雲漢知晴色旋買壺觴辦勝遊  
平旦爭門人競入與君先上望京樓

從叔君冕見訪山間自云平生躬耕釣無求於  
人中有至樂令某作詩寫其蕭散之狀為賦此  
篇



青鞋布襪綠蓑衣  
滿目秋江白鳥飛  
小楫扁舟乘興出  
斜風細雨釣魚歸  
有間茅屋臨蒼巘  
尋箇樵夫上翠微  
閒趁牧童吹短笛  
倒騎牛背入柴扉

和李彥文春雪

聞道江城雪似沙  
東風吹動曉寒加  
輕飄瓦屋鱗鱗密  
亂颭檣竿櫛櫛斜  
著地正憐新種竹  
漫天故壓未開花  
君應對此方乘興  
飲似長虹吸海涯

自江上遊龍興至淨因寺



曉踏晴沙江上堤堤平沙淨草萋萋牆頭野杏纔先發  
葉底流鶯自在啼聞道漁舟通廬水只應煙火是桃溪  
深邨疑有秦人在記取來時路恐迷

酬梁宰惠遊永新百韻

君曾攝  
縣事

聞君跋馬禾川道攀蹬遺民識轡環滿野悲風蟠蔓草  
數聲漁笛下汀灣雲藏甘露峰頭寺路接清湘雨後山  
觸事便能成百韻偶題僧壁不須刪

波光亭



遶庭春水縠紋生拍岸風微鏡面平日破浪花搖柱礎  
影浮山翠落簷楹魚跳蓮葉東西動月湧金盆表裏明  
夜久光凝收綠淨冷涵星漢逼人清

酴醾

百花狼籍點青苔始見酴醾爛漫開號國朝天嫌粉污  
唐昌夜月恐仙來寒梅勝韻聊堪友穠李凡姿詎敢陪  
便欲乘風凌倒影醉尋香徑上瑤臺

呂本中



春日即事

病起多情白日遲，強來庭下探花期。  
雪消池館初春後，人倚闌干欲暮時。  
亂蝶狂蜂俱有意，兔葵燕麥自無知。  
池邊垂柳腰支活，折盡長條為寄誰。

山陽寶應道中與汪信民兄弟洪玉父杜子師  
張益中日夕過從自過高郵不復有此樂也因  
作此詩寄懷

日日南風沙打圍，挂帆端為故人回。  
長空渺渺水無際，



遠樹冥冥花自開  
疾病久辜鸚鵡杓  
江山稍近鳳凰臺  
月明雪霽山陰道  
尚想王郎乘興來

春晚郊居

柳外樓高綠半遮  
傷心春色在天涯  
低迷簾幙家家雨  
淡蕩園林處處花  
簷影已飛新社燕  
水痕初沒去年沙  
地偏長者無車轍  
埽地從教草徑斜

遊陽山廣陵寺

沂流蕩槩到陽山  
寺後雲山縹緲間  
雨洗竹萌穿野岸



風吹榕葉落荒灣僧眠白日鐘聲靜花送青春鳥語閒  
留醉嶺南無所恨不妨蠟屐恣躋攀

永州法華寺西亭

西亭清淨冠南州蠟屐聊為半日留蒼莽輕煙起山麓  
連蜷雉霓落城頭禽聲高下雲間木帆影參差天際舟  
欲去憑闌一回首晚風吹角不勝愁

春晚

柳暗鶯啼春正妍斷腸分水灌平田花開花落幾番雨



山淡山明一抹煙突兀初晴雲外寺橫斜欲晚渡頭船  
天涯因悵滄洲興何用區區苦自憐

寄宣城故舊

宣城經歲無他事尚喜交遊不棄遺疊嶂樓頭納涼處  
宛陵堂下探梅時君今尚要一囊粟我去亦無三徑資  
歸卧雲山最深處因書頻報故人知

陳與義

次韻樂文卿北園



故園歸計墮虛空。啼鳥驚心處處同。四壁一身長客夢。  
百憂雙鬢更春風。梅花不是人間白。日色爭如酒面紅。  
且復高吟置餘事。此生能費幾詩筒。

龍門

不到龍門十載強。斷崖依舊挂斜陽。金銀佛寺浮佳氣。  
花木禪房接上方。羸馬乍來還徑去。流鶯多處最難忘。  
老僧不作留人意。看水看山白髮長。

寓居劉倉解中晚步過鄭倉臺上



紗巾竹杖過荒陂，滿面春風二月時。  
世事紛紛人易老，春陰漠漠絮飛遲。  
士衡去國三間屋，子美登臺七字詩。  
草遶天西青不盡，故園歸計又支頤。

除夜

城中爆竹已殘更，朔吹翻江意未平。  
多事髭毛隨節換，盡情燈火向人明。  
比量舊歲聊堪喜，流轉殊方又可驚。  
明日岳陽樓上去，島煙湖霧看春生。

立春日雨



衡陽縣下春日雨遠映青山絲樣斜容易江邊欺客袂  
分明沙際濕年華竹林路隔生新水古渡船空集亂鴉  
未暇獨憂巾一角西溪當有續開花

曾幾

諸人見和梅花再次韻

蠟炬高花半欲摧斑斑小雨學黃梅有時燕寢香中坐  
如夢前村雪裏開披拂故令攜袖滿橫斜便欲映窗來  
重簾幽戶深深閉亦恐風飄不得回



八月十五夜月

雲日晶瑩固自佳幽人有待至昏鴉遠分巖際松楓樹  
復亂洲前蘆荻花曳履商聲憐此老倚樓長笛問誰家  
霜螯玉柱姚江上作意三年醉月華

雪作

卧聞維霰却無聲起看階前又不能一夜紙窗明似月  
多年布被冷於冰履穿過我柴門客笠重歸來竹院僧  
三白自佳晴亦好諸山粉黛見層層



沈與求

過徐氏莊居

只著南冠不著纓  
掉頭防我問功名  
數椽茅屋有時漏  
一塢野田無具耕  
酒地定能容勝踐  
墨畦終擬過生平  
扣舷歸去蒹葭闊  
後夜相思看月明

次韻盧憲春意

少陵花惱便顛狂  
天與多情付此郎  
宿露園林鶯舌亂  
暖風庭院蜜脾香  
閒愁幾欲縈春思  
幽怨還能入醉鄉



應斷玉樓雙望眼便須催從理歸檣

清明

杏火燒空潑眼明遊人蕩槳綠蕪城山歌慣習吳歛調  
水戲終含楚些聲草滿池塘春漲淺燕歸簾幙午風輕  
踏青舊約誰能問已喜年來粥有餠

次韻江元壽題寧境寺湖光亭

客行終日厭區區暫借晴光照坐隅水漾龍鱗浮宰堵  
尊開雉尾供伊蒲欲隨漁子飛雙槳似與仙翁在一壺



日亂風埃知有幾肯來幽處濯纓無

秋日閒居

茅屋秋風斗破除蕭騷渾似浣溪居青山侍坐從吾好  
黃帽籠頭與俗疎賴有園官能送菜可無溪友解留魚  
從今輒莫慙枵腹一飽須煩插架書

御選宋詩卷五十





總校官庶吉士臣侍朝  
校對官檢討臣蕭九成  
膳錄舉人臣李駟



財團  
法人

佛陀教育基金會

釋淨空

敬贈